



John Carter Brown.







Manuscript No. 103

2d issue -

RELATION

DE CE QUI S'EST PASSE'
EN LA MISSION DES PERES
DE LA COMPAGNIE DE IESVS,
EN LA
NOUVELLE FRANCE,
ES ANNEES 1653. & 1654.

Enuoyée au R. P. NICOLAS ROYON,
Prouincial de la Prouince de France.

*Par le R. P. FRANÇOIS LE MERCIER,
Superieur des Missions de la mesme
Compagnie.*



A PARIS,
SEBASTIEN CRAMOISY }
Imprimeur ordinaire du Roy }
 & de la Reyne, }
ET GABRIEL CRAMOISY. }
 ruë S.
 lacques
 aux Ci-
 cognes.

M. DC. LV.
Avec Priuilege du Roy.

WOLFE

JAMES CARTER BROWN.



TABLE DES CHAPITRES
contenus en ce Liure.

R elation de ce qui s'est passé en la Nouvelle France, és années 1653. & 1654.	page 1
CHAP. I. Dessen des Iroquois Anniehronnons, &c.	8
II. Dessen des Iroquois Onnontachronnons, &c.	16
III. Prise d'un François à Montreal,	32
IV. Arriuée d'une flotte de canots Hurons & d'Algonquins à Montreal, &c.	43
V. Arriuée des Iroquois Anniehronnons à Quebec.	51
VI. Voyage du P. S. le Moine dans le pays des Iroquois Onnontachronnons.	56
VII. Conseil pour la Paix avec les Iroquois.	74
VIII. Dessen d'une Habitation dans le grand lac des Iroquois.	97
IX. Etat de la Colonie Huronne dans l'Isle d'Orleans.	104
X. De la Premiere Congregation de Nostre-Dame.	114
XI. Remarques tirées de quelques Lettres & de quelques Memoires venus du païs.	146

Extrait du Priuilege du Roy.

PAR grace & Priuilege du Roy, donné à Paris le 22. Decembre 1654. Signé CRAMOISY. Il est permis à SEBASTIEN CRAMOISY, Marchand Libraire, Imprimeur ordinaire de sa Maieité, ancien Escheuin & Iuge Consul de la Ville de Paris, d'imprimer ou faire imprimer, *La Relation de ce qui s'est passé en la Mission des Peres de la Compagnie de IESVS au pais de la Nouvelle France depuis l'année 1653. iusques a l'Esle de l'année 1654. &c.* Et ce pendant le temps & espace de neuf ans consecutifs. Avec defences a tous Libraires & Imprimeurs, & autres personnes de quelque qualité & condition qu'elles soient, d'imprimer ou faire Imprimer ladite Relation &c. sous pretexte de déguisement, ou changement que l'on y pourroit faire, à peine de confiscation & d'amende portée par ledit Priuilege.

Permission du R. P. Vice Prouincial.

NOVS LOVYS CELLOT, Vice Prouincial de la Compagnie de IESVS en la Prouince de France, auons accordé au sieur SEBASTIEN CRAMOISY, Marchand Libraire; Imprimeur ordinaire du Roy, & de la Reyne. ancien Escheuin & Consul de cette Ville, l'impression des Relations de la Nouvelle France. Fait à Paris ce 22. Decembre 1654.

LOVIS CELLOT,



RELATION
DE CE QVI S'EST
PASSE' EN LA MISSION
DES PERES DE LA COMPAGNIE
de IESVS, au pais de la Nouuelle
France, depuis l'Esté de l'année
1653. iusqu'à l'Esté de l'année
1654.

ENVOYEE

AV R. P. NICOLAS ROYON,
*Provincial de la Compagnie de IESVS
en la Prouince de France.*

MON R. P.
Pax Christi,
J'ay attendu iusques à ce iour vingt

A

Et uniesme du mois de Septembre, à
 mettre la main à la plume, pour in-
 former Vostre Reuerence de l'estat où
 nous sommes, n'ayant pû le faire plu-
 tost, à cause que nous ne le scaurions
 pas nous-mesmes. Nos esprits ont esté
 tellement partagez depuis un an, qu'à
 vray dire, nous auons iouy de la Paix,
 pensans estre en la guerre. Dieu la de-
 dans a beny nos conduites, Et des des-
 seins de trahison qu'auoient les Iroquois
 nos ennemis, il en a tiré leur bien Et le
 nostre, nous donnant une veritable
 Paix qui nous ouure les voyes Et les
 chemins pour les aller instruire dans leur
 païs, Et pour y porter la foy, qui d'un
 peuple cruel Et barbare, en fera un peu-
 ple Chrestien. Ce sont les esperances
 que nous en donne l'heureux succez d'un
 voyage, qu'un de nos Peres y a fait
 depuis peu. C'est le Pere Simon le
 Moine, qui y fut enuoyé au commen-

cement de Juillet, & qui a laissé nos esprits en suspens, iusques à son retour, qui fut il y a peu de iours ; en nous comblant de ioye, autant que nous auions suiet de craindre, qu'il ne fust bruslé cruellement, comme desia plusieurs de nos Peres l'ont esté par ces mal-heureux. Mais Dieu a conduit toutes les demarches du Pere dans le cœur des Nations Iroquoises. Il y a trouué une Eglise captiue ; de nos anciens Hurons, il a esté receu comme un Ange du ciel, de ces bons Chrestiens : Il y baptisé une trentaine de petits enfans Iroquois, malades & en danger de mort ; & entre les personnes adultes, une ieune femme Iroquoise a esté la premiere qui ait receu le Sainct Baptesme ; Cette femme auant la venue du Pere, viuoit desia comme Chrestienne, ne l'estant pas encore : elle auoit la foy de nos mysteres, qu'une Captiue Huronne luy auoit

4
enseignée. Il y a conuertý un grand Capitaine Iroquois, Chef de dix-huict cents hommes qu'il menoit à une nouvelle guerre, que Dieu leur a sans doute suscitée pour nous donner la Paix. Ce Capitaine ayant pressé saintement son baptisme, auant que d'aller au peril. Enfin le Pere y a receu des presens de la nation la plus considerable, qui est au centre des autres nations Iroquoises, qui nous inuitent à les aller instruire pour se faire Chrestiens. Nous leur auons donné parole que le Printemps prochain nous irions nous y habituer, & y bastir une maison, semblable à celle que nous auions au milieu des Hurons, auant que la guerre nous en eust chasséz. V. R. verra la suite de tout cecy dans la Relation, que ie pretens escrire par voye de Iournal, afin que la distinction des temps puisse empescher la confusion qu'il y auroit en des affai-

res, d'ailleurs assez broüillées.

L'entreprise d'aller dès le Printemps prochain, porter une Mission dans le cœur des Nations Iroquoises, nous oblige à demander à Vostre Reuerence le secours de six de nos Peres; car nous sommes trop peu. Monsieur de Lauzon nostre Gouverneur fait état d'y enuoyer un nombre de François choisis, pour y commencer une nouvelle habitation. Nous y enuoyerons de nos Peres, & quelques hommes de travail pour y bastir une premiere Eglise, en l'honneur de la tres-Saincte Vierge. Les despeses seront excessiues; mais estant les affaires de Dieu plus que les nostres, sa Prouidence y pouruira: il y a dans la France des personnes de Charité, Zelees pour la Conuersion des Sauvages, & qui font l'office d'Apostres dans les païs Barbares, quoy qu'ils ne quittent pas leur Patrie, leurs enfans ny

leurs femmes. Il y a mesme des saintes Vefues , de chastes Vierges , & quantité de Femmes mariées, qui prennent part à cette gloire , de prescher l'Euiangile d'un bout du monde à l'autre , y faisant passer leurs aumosnes, pour cooperer au salut des âmes rachetées du Sang de IESVS-CHRIST. Ce n'est pas ce secours qui nous manquera ; & deussions-nous partir , comme souvent nous auons fait dans nos Missions Hurones, le seul baston en main & la seule confiance en Dieu , pour toutes provisions ; Nos Peres y sont tous resolu. Ceux qui viendront à leur secours , sachent pour se consoler, qu'il y aura beaucoup à faire & bien plus à souffrir , & tout à craindre , ayant affaire à des Nations Barbares , qui ne respirent que le sang , & qui ont beu celui des Martyrs. Peut-estre que dès l'abord on fera rencontre. Quoy qu'il en soit, nos vies

7

ne peuvent estre mieux consommées
qu'en procurant la gloire d'un Dieu, qui
le premier a consommé sa vie pour nous.
V. R. nous obtiendra pour cet effet, les
prieres de tous nos Peres & Freres de
la Prouince, & nous donnera, s'il luy
plait sa sainte Benediction.

Mon Reuerend Pere,

A Quebec ce 21.
Septembre 1654.

Vostre tres-humble & tres-obeissant
seruiteur en Nostre Seigneur,
FRANÇOIS LE MERCIER.

A iiii

CHAPITRE I.

Dessein des Iroquois Annielronnons, dans le Traitté de Paix qu'ils auoient commencé avec nous au mois de Novembre 1653.



PRES l'heureuse deliurance du P. Poncet retourné de sa captiuité, & sauué quasi par miracle, de la mort & des flammes, où son compagnon de fortune auoit esté brullé cruellement. Les Iroquois Annielronnons, nous ayans faits de grands presens, pour tesmoignage de la sincerité de leur cœur: & en ayans receu de reciproques: furent presséz de leur retour, voyans que l'hyuer s'approchoit. En mesme temps vn nauire

ès années 1653. & 1654.

9
qui restoit encore à Quebec, fit
voile pour retourner en France,
& pour y porter les nouvelles de
cette Paix tant desirée, & de la
ioye qui s'estoit desja respandüe
sur le visage & dans les cœurs de
tous les peuples nos alliez, Al-
gonquins, Montagnetz, & Hu-
rons.

Les plus beaux iours ont sou-
uent leurs nuages, & Dieu ne
veut pas en ce monde que nos
joyes y soient toutes pures. Le
nauire qui retournoit en France
richement chargé des despoüil-
les des Castors du païs, fut des-
poüillé luy-mesme, estant tom-
bé entre les mains des Anglois,
qui l'attendoient dans la Manche.

Icy, en mesme temps, trois
ieunes hommes Hurons, ayans
fait rencontre dans les bois, de

10 *Relation de la Nouvelle France,*
deux Sauvages de la Nation des
Loups, Alliez des Iroquois Anni-
chonnons, les surprirent de nuit,
pour auoir leur butin, & les as-
sommerent sur la place.

Ce coup de trahison fut decou-
uert par les Iroquois mesmes, qui
auoient ramené le Pere Poncet ;
lors que passans à leur retour, par
l'habitation de nos François, qui
est aux trois Riuieres; ils y recon-
neurent les despouilles de leurs
Alliez, & les robes teintes de leur
sang, qui sans doute crioit ven-
geance au Ciel. C'estoit bien pour
estoufer dans le berceau, les es-
perances d'yne paix, qui ne faisoit
que naistre : Mais Dieu y mit la
main, le Gouverneur de trois Ri-
uieres ayant fait mettre aux fers
les meurtriers Hurons, pour en
faire iustice, & pour donner à co-

es années 1653. & 1654. II

ignoistre que les François n'a-
uoient point de part en ces crimes.
Les Iroquois furent contens de
nostre procedé, & nous firent des
presens eux-mesmes, pour la deli-
urance de ces trois criminels, di-
sans que la Paix estant faite, ils
estoiient freres des Hurons; qu'ils
n'estoient plus qu'une famille, &
qu'ils prennoient sur eux le soin
d'arrester dans leur source les con-
sequences de ce meurtre, puisque
cette Nation des Loups leur estoit
alliee.

Pour nous lier plus étroitement
par ensemble, les Iroquois deman-
derent que quelques-uns de nos
François allassent en leurs pais, &
qu'ils nous laisseroiët reciproque-
ment des ostages; pour affermir,
nous disoient-ils, ce nœud sacré
d'une amitié inuiolable, qu'ils sou-

12 *Relation de la Nouvelle France,*
haitoient conseruer avec nous ,
aussi long temps que nos grands
fleues couleroient dans la mer.
Deux ieunes soldats de bonne vo-
lonté se presenterent pour ce
voyage, quatre Iroquois nous de-
meurans.

Peu de iours apres le depart des
Ambassadeurs Iroquois , les plus
anciens Capitaines de nos Hurons
nous descourirent vn secret, qui
iusques alors nous auoit esté in-
connu. Ils nous firent paroistre
trois grands coliers de Porcelaine
d'une rare beauté. Ce sont , nous
dirent-ils, des presens qui sont ve-
nus du profond des enfers , d'un
demon qui nous a parlé , dans
l'horreur d'une nuit obscure ;
mais vn demon qui nous fait
peur ; puis qu'il n'aime que les te-
nebres , & qu'il redoute la lu-
miere.

En vn mot, ils nous apprirent que la uuiet mesme qui auoit suivy le beau iour, auquel les Iroquois Anniehronnons auoient conclu leur traité de paix avec nous, le chef de cet ambassade les auoit esté resueiller sur la my-nuit, pour tenir conseil avec eux. Qu'il leur auoit dit nettement, que le dessein de son voyage estoit pour les destacher d'avec nous, & transporter leur colonie Huronne dans son pais, où estoient desia leurs parens emmenez autrefois captifs, qui ne supportoient leur absence qu'avec des regrets & des tristesses inconsolables, qu'ils les attendoient avec amour & qu'ils les accueilleroient avec ioye. Que tout le procedé qu'ils auoient tenu dans la deliurancedu Pere Ponce, & dans leurs pour parlers de

14 *Relation de la Nouvelle France,*
Paix, n'estoit que pour couvrir
leur ieu, & pour auoir plus de
moien de parler sans soupçon avec
nous & conduire toute cette affai-
re avec douceur & efficace.

Nous n'auons osé refuser ces pre-
sens, nous adiousterent ces Capi-
taines Hurons; car c'eust esté rom-
pre avec eux, & refuser la Paix,
qu'il faut tâcher de conseruer, puis-
que nous sommes dans l'impuif-
sance de soustenir la guerre. Aussi
ne les auons nous receus qu'avec
crainte, sçachans trop bien que
ce ne sont que des perfides, & qu'une
feinte amitié avec eux, est mille
fois plus dangereuse, que ne se-
roit vne inimitié toute ouuerte.
Peut estre qu'en vous trompant,
ils nous veulent tromper, & que
nous ayans diuisez, ils ont des-
sein de venir plus aisement à bout

és années 1653. & 1654. 15

des vns & des autres. Peut-estre veulent-ils se fortifier de nostre Colonie, & quand nous serions avec eux, nous obliger à prendre les armes contre vous. Peut-estre aussi qu'ils agissent avec les François dans la sincerité, & que faisant mine de vous vouloir tromper, ils veulent nous tromper nous mesmes, nous ayans retirez de vostre protection: car qui fait vne trahison, est capable d'en faire plus d'une.

Ces Capitaines Hurons demandent là dessus nos aduis, nous adioustans qu'ils estoient resolu de viure & de mourir avec nous; quoy que pour contenter les attentes des Iroquois, ils leur eussent fait des presens reciproques à ce mesme dessein.

Monsieur le Gouverneur leur

16 *Relation de la Nouvelle France,*
fit response, Qu'ils eussent bien
fait de descouvrir ce conseil secret
des la nuit mesme qu'il fut tenu
qu'il estoit bon de sçauoir les pen-
sées de ceux qui nous vouloien
tromper; que Dieu neantmoin
beniroit l'innocence de nostre
procedé, & que le temps nous
donneroit quelque occasion, de
tirer le bien mesme des Iroquois
& leur salut, des desseins qu'ils au-
roient de nous perdre.

CHAPITRE. II.

*Dessein des Iroquois Onnontachron-
nons arrivez à Quebec au mois de
Feburier 1654.*

LEs Iroquois Onnontachron-
nons sont ceux qui l'an passé
parurent à Montreal, y portans les
premieres nouvelles de la Paix,
quoy

quoy qu'il nous soit certain qu'ils n'y estoient venus qu'avec des pensées de la guerre. Ils enuoyerent leurs Ambassadeurs à Quebec, au mois de Septembre suiuant, pour y traiter de cette Paix. y apportans de tres riches presens pour cét effet.

Ils auoient promis que l'hyuer ils nous reuiendroient voir. Ils ont tenu leur parole; & d'abord ils ont demandé qu'on assemblât le conseil. Leur Capitaine se voyant au milieu de tous nos François, y étoit le six grands coliers de Porcelene, c'est à dire qu'il auoit six choses d'importance à nous dire.

Le premier present estoit pour calmer l'esprit des François, de peur qu'estans troublés, ils ne prissent vne parole pour vne autre, & qu'ils ne s'offensassent de quelque

18. *Relation de la Nouvelle France,*
mot mal entendu.

Le second estoit pour tesmoigner que son cœur estoit sur sa langue, & sa langue en son cœur : c'est à dire qu'il n'y auoit en tout son procedé qu'une sincerité toute aimable, & dont on n'auroit pas suiet d'entrer en défiance.

Le troisieme estoit vn May, qu'il plantoit, disoit-il, au milieu de la grande Riuere S. Laurens, vis à vis du fort de Quebec, de la maison d'Onontio, le grand Capitaine des François (c'est Monsieur de Lauson nostre Gouverneur) vn May, qui porteroit sa cime iusques au dessus des nuës, afin que toutes les Nations de la terre le pussent voir, & que ce fust vn rendez-vous, où tout le monde peust reposer en Paix, sous l'ombre de ses feuilles.

Le quatriesme present se donnoit pour faire vn abilme profond iufqu'aux enfers, dans lequel on iet-teroit toutes les medifances, tous les foupçons, & tout ce qui feroit capable d'alterer les efprits, & de corrompre la douceur d'une Paix, que le ciel nous auoit donnée.

Le cinquiesme estoit pour oster les nüages, qui auoient obscurcy le soleil. Ces nüages, dit-il, font les discours de defiance des Algonquins & des Montagners, qui empeschent que le soleil ne respande ses douces lumieres sur nous, & sur eux. S'ils estoient moins credule à mille fauffetez, leur esprit seroit vn soleil qui donneroit du iour partout, & dissiperoit les tenebres.

Enfin le fixieme present estoit pour faire abifmer si auant dans la

20 *Relation de la Nouvelle France,*
terre, leur chaudiere de guere, où
ils auoient accoustumé de faire
bouillir la chair humaine, & les
corps decoupez en pieces, de leurs
captifs qu'ils mangeoient avec
cruauté; que iamais cette chaudiere
abominable ne parust sur terre,
puisque toute leur haine se trou-
uoit changée en amour.

Ce conseil se tint avec nous le cin-
quiesme iour de Feburier. Ce n'e-
stoit rien que ioye, qu'ouuerture
de cœur; & le soleil n'a pas des
rayons plus benins, que nous pa-
roissoient les visages de ces Am-
bassadeurs: Mais vne nuit obscure
suit apres vn beau iour.

Nous apprenons d'un Chrestien
Huron que ce Capitaine Iroquois
Onnontachronnon, estoit dans
le mesme dessein qu'auoient esté
les ambassadeurs Anniehronnons;

de détacher d'avec nous la Colonie Hurone, & d'attirer dans leur pais les familles entieres, hommes, femmes, & enfans. Que pour l'exécution il propoſoit vn moien auffi facile, qu'il eſtoit ſpecieux. Sçauoir que les Hurons, des le commencement du printemps teſmoigneroient eſtre attirez de la beauté de Montreal, & s'y vouloir habituer, qu'ils prendroient ce chemin, & que ſans doute les François, fauoriſeroient eux-mesmes cette retraite. Mais qu'approchant de l'Iſle de Montreal, ils monteroient vn bras de la Riuere, au lieu d'un autre, & qu'eſtans arriuez au deſſus de cette Iſle, ils y trouueroient vne bande de cinq cens Iroquois Onnontachronns, qui en les attendant, y battiroient vn fort, y feroient

22 *Relation de la Nouvelle France;*
bonne chasse, & des canots, pour
faciliter le reste du voyage : qu'au
reste ce dessein deuoit estre ca-
ché, mesme aux Hurons ; à la re-
serue de trois ou quatre qui con-
duiroient prudemment cette af-
faire , sans donner autre idée a
leurs femmes, & à leurs enfans, si-
non de ce transport de leur deme-
re à Montreal. Que quatre à cinq
cents Iroquois leur viendroiet à la
rencontre, entre les trois Riuieres
& Montreal ; & qu'alors il seroit
temps de publier tout leur dessein ;
qu'aucun n'y pourroit contredire,
puis qu'ils seroient contraints de
prendre la loy du plus fort ; & que
plustost ce leur seroit trop de bon-
heur d'estre amys des vainqueurs,
& d'aller en vn pais victorieux , &
vn pais de Paix , qui va porter la
guerre au loin , n'en receuant au-

cun dommage.

Cet Ambassadeur Iroquois auoit fait quatre presens pour ce dessein; mais dans l'obscurité & dans l'horreur de la nuit, à ceux qu'il croioit estre personnes de confiance, avec promesse d'en garder le secret inuiolable.

Quand le tout nous fut rapporté, si nos Hurons furent en peine, nous le fumes avec eux. Nous voyons bien, nous dirent ces Capitaines Hurons, que ces deux Nations Iroquoises à l'enuie l'vne de l'autre, veulent nous attirer. Quelque dessein que nous prenions, nous n'y enuifageons que du malheur. Nous auons occasion de croire, que cet empressement qu'ils tesmoignent, chacun de son costé, n'est pas vn amour qu'ils nous portent; mais vn dessein de

24 *Relation de la Nouvelle France,*
se vanger sur nous, chacun d'une
iniure receüe, qu'ils n'ont pas si
tost pardonnée, Les Onnonta-
ehronnons ont sur le cœur la mort
de trente quatre de leurs hommes
gens d'élite, & de consideration
parmy eux, que nous trompaf-
mes, il y a trois ans, en nostre
ancien païs, lors qu'eux-mesmes
nous vouloient tromper. Nous
preuinmes d'un iour le malheur
qui alloit fondre sur nos testes,
lors qu'ils estoient dans le dessein
de nous massacrer, sous ombre
d'un faux traitté de Paix, dans le-
quel ils nous vouloient surpren-
dre. L'Anniehronnon n'aura pas
oublié la mort de leur grand Capi-
taine Torontifati que nous brula-
mes aux trois Riuieres, il n'y a que
deux-ans, lors que luy, voulant
nous trahir, il se vit luy-mesme

trahy. Quoy qu'en cela nous soyons innocens, ils nous prennent pour des criminels, de n'avoir pas receu la mort, de leur main, à l'heure qu'ils fouhaitoient. Ils nous regardent comme autant de victimes consacrées à leur cruauté; & c'est ce qui probablement les pousse à nous tesmoigner tant d'amour.

Ce qui accroist nostre malheur en ce rencontre, adioustèrent ces Capitaines Hurons, c'est que quelque party que nous prenions, eussent-ils arraché de leur cœur, ces desirs furieux qu'ils ont de se vanger de nous; l'autre party se croyant mesprisé, & postposé aux autres; il entra en des rages nouvelles, il en fera vn nouveau crime, qui les irritera plus que jamais. Que si ny les vns ny les

26 *Relation de la Nouvelle France,*
autres, ne nous enleuent en leur
païs, leur esperance estant deceuë,
se changera en desespoir : & se
voyant esgalement trompés, ils se
joindront pour coniurer nostre
ruine, ainsi nous ne voyons que
des mal heurs de tous costés.

Après vne longue suspension
de ce qu'ils deuoient faire, le plus
ancien des Capitaines adressa sa
parole à Monsieur le Gouverneur.
C'est à toy maintenant, Onon-
tio, & non pas a nous de parler.
Nous sommes morts depuis qua-
tre ans, que nostre país fut desolé.
La mort nous suit par tout, elle est
toufiours deuant nos yeux. Nous
ne viuons qu'en toy : nous ne
voyons que par tes yeux ; nous ne
respiroons qu'en ta personne ; &
nos raisonnemens sont sans raison
sinon entant que tu nous en don-

ne. C'est donc à toy, Onontio, à nous tirer de ces perils, nous disant ce qu'il nous faut faire.

Ce rencontre nous estoit facheux : car vn traistre qui se sent criminel, & qui se voit descouvert craint qu'on ne le preuienne, & croit que son salut gist à haster la perte du plus innocent, sçachant bié qu'il merite luy-mesme d'estre perdu. Ainsi nous auions de la peine à faire paroistre que nous sceussions leur procedé. D'ailleurs de resmoigner n'en rien sçauoir, c'estoit les engager à le continuer, & en differant le remede, en rendre le mal incurable, qui tendoit à la ruine, ou des François, ou des Hurons, & plus probablement, autant des vns que des autres.

Enfin nous iugeasmes qu'il y auroit du mieux de faire cōnoistre :

28 *Relation de la Nouvelle France,*
à l'Iroquois, que de nous-mêmes
nous nous portions à leur dessein,
sans tésmoigner ny defiance, ny
ialousie; en telle façon toute-fois
que nous trouuerions les moyens
de differer cette entreprise à quel-
que année suiuant; esperant, ce
qui est arriué, que Dieu donneroit
iour à nos tenebres, & que le
temps iroit disposant les esprits à
vne Paix sincere.

Nos Capitaines Hurons mirent
comme en confiance, à l'Ambassa-
deur Iroquois, que leur dessein
reüssissoit au dela de leurs esperan-
ces; que les François leur propo-
soient de faire eux-mêmes vne
nouuelle habitation sur le grand
lac des Iroquois; que cela estant de
la sorte, il y auroit du mieux de
leur communiquer leur dessein,
iusqu'alors caché, sans paroistre

qu'on eust voulu leur rien celer;
l'Iroquois s'y accorde.

On tient conseil: on y produit
les quatres coliers Iroquois, par
lesquels on inuitoit la colonie Hu-
rone, de se faire vn nouveau païs,
dans des terres autre-fois enne-
mies, qu'on leur promet deuoir
leur estre vneterre de Promission.

A ces presens, les Hurons ne
respondirent que deux mots, &
cela par deux autres presés: Le pre-
mier pour faite differer l'executiõ
de ce dessein, au moins pour vne
année. Le second present pour ex-
horter les Iroquoys à bastir pre-
mierement vne demeure aux ro-
bes noires, c'est à dire, à nos Peres
qui les enseignent, assurens qu'en
quelque lieu que nos Peres vou-
lussent aller, la colonie les suiuroit.

Monsieur le Gouverneur se mit

30 *Relation de la Nouvelle France,*
de la partie, & telmoigna agreer
ce dessein par six autres presens.

Par le premier il exhortoit les
Iroquois Onnontaehronnons a
faire bon accueil aux Hurons, lors
qu'ils seroient en leur pais.

Par le second, il les prioit de ne
pas presser les Familles Huronnes,
qui ne seroient pas encore dispo-
sées à ce voyage.

Par le troisieme, il demandoit
qu'on leur laissast vne liberte tou-
te entiere, d'aller la part où ils
voudroient, soit que d'aucuns fus-
sent portés d'inclination pour le
pais des Iroquois Anniehron-
nons, d'autres pour Sonnoutsan-
ne, soit que d'autres respirassent
vers leur ancien pais, ou que d'au-
cun voulussent continuer leur de-
meure avec les François.

Le quatrieme present estoit

pour mettre la voix d'Onnontio dans la bouche d'Annonchiaffé, c'est à dire que Monsieur nostre Gouverneur leur tesmoignoit qu'ils n'auroient plus aucun besoin de descendre iusques à Quebec, pour entendre sa voix, & les pensées sur ce traité de Paix: mais qu'ils pourroient agir avec Monsieur de Maisonneufue, Gouverneur particulier de Montreal, avec autant de confiance qu'avec luy-mesme, & qu'en cela, il luy donnoit tout son pouuoir.

Le cinquieme present estoit pour transplanter le May qu'ils auoient mis deuant Quebec, & le transporter à Montreal, afin qu'estant vne place frontiere, on s'y trouuaft plus aisément.

Le sixiesme present estoit pour reünir tous les esprits des Iro-

32 *Relation de la Nouvelle France,*
quois, qui sont cinq nations différentes, afin que cette Paix fust generale, & qu'il n'y eust aucune ialousie des vns, contre les autres.

Par ce moyen nous contentions tous les esprits, estans amys de tout le monde, & aucun ne pouuant se plaindre de nous, sur tout laissant chacune des Nations Iroquoises dans l'esperance d'attirer à eux les Hurons, qu'ils desiroient avec tant d'ardeur.

Cela fait, les Ambassadeurs songerent a leur retour, nous donnant assurance d'une Paix inuiolable.

CHAPITRE III.

Prise d'un François à Montreal par les Iroquois Onneiioehronnon au mois d'Auril 1654. & de sa deliurance,

TOUT le long de l'hyuer ne s'estant rien passé qui tra-
uerst

uerfast nos ioyes, tout ne respirant que la Paix , principalement à Montreal : La grande quantité de Castors , qui ont peuplé dans les ruisseaux , & dans les rivières voisines, y attirerent nos François, dès le commencement du printemps, après la fonte des neiges , & des glaces; de tous costez on leur faisoit bonne chasse, & bonne guerre avec autant de ioye que de profit.

Vn ieune Chirurgien, ayant suivi sa proye , & tendu ses pieges au Castor, en des lieux escartez , ou iamais aucune Solitude ne luy auoit paru plus douce: vne bande d'Iroquois Onneiochronnons , qui estoient là venus à la chasse des hommes, y firent prise de ce chasseur aux bestes. Ils l'enleuerent proprement, le iettant dedás leurs canots sans laisser aucune marque

34 *Relation de la Nouvelle France,*
de leur venuë. On n'eust rien sçeu
de ce malheur, si par bon-heur vn
Huron ne se fust échapé, qui
étoit de la bande de ces ennemis,
lequel ils auoient laissé au lieu
de leur abord, dans l'Isle de Mon-
treal, pour y garder leur équipage,
& pour y tenir compagnie à deux
ieunes femmes Iroquoises, qui ac-
compagnoient leurs marys, tant
cette guerre est douce & facile à
nos ennemis. Ce Huron ayant pris
son temps, accourt prompte-
ment au fort de Montreal; y don-
ne aduis qu'on soit sur ses gardes,
qu'il est venu vne troupe de dou-
ze Iroquois, Onneiochronnons,
qui sont en queste aux euuirs,
n'ayans que des pensées de guerre,
de sang & de carnage.

On tire le canon, pour signal
de retraite. Ce ieune Chirurgien

se trouue seul de manque, & on ne doute point qu'il ne soit ou captif, ou tué sur la place. De Môtreal, on en depesche les aduis aux trois Riuieres, & à Quebec. Nous voila de rechef dans les terreurs d'une nouvelle guerre, & dans l'attente d'une armée ennemie, le Huron échappé nous assurant qu'elle estoit proche, & que tout n'estoit que trahison. Mais tout ne fut que pour affermir nostre Paix, & pour nous faire sentir au doit, que Dieu seul trauailloit pour nous, au delà de toutes nos prudences, & de ce que nous eussions osé esperer.

Au commencement du mois de May vne bande d'Iroquois Onnontaebronnon arriuēt à Montreal, ne sçachans rien de cet acte d'hostilité. On les reçoit avec amour; On leur ouure le cœur, &

36 *Relation de la Nouvelle France,*
la porte du fort. Apres vn accueil
fauorable, on leur parle de la prise
du François emmené captif: ils
sont surpris à ces nouuelles; ils
tremblent & ils palissent, croyans
qu'on s'en voulust vanger sur eux.
On les rassure avec douceur, &
on leur fait entendre que la coutu-
me des François, ne fut iamais de
meller l'innocent avec le coupable;
que d'un amy, on n'en fait
pas vn ennemy, s'il ne le veut être
luy-mesme.

Il y auoit en cette bande vn Ca-
pitaine, qui porte le nom le plus
considerable de toute sa Nation,
Sagochiendagehté: Non non, dit-
il, vostre bonté sera tousiours vi-
ctorieuse. Nos malices & nos
fourbes, ne pourront pas l'étein-
dre, malheur à ceux qui iamais en
abuseront. Je veux moy-mesme

demeurer vostre captif, & vostre ostage, iusqu'à ce qu'onayt deliuré le François emmené captif. Ma vie respondra pour la sienne; & si ceux de ma nation ont du respect, & de l'amour pour moy, le François viura, & sa vie sauvera la mienne.

Il depute à l'heure mesme vn canot expres, pour porter ces nouvelles à Onnontaé, dont il est Capitaine: Là on y prend l'affaire à cœur; on y amasse des presens, & on enuoye vn ambassade à Onneiout, Nation de ceux qui auoient fait le coup, on leur demande le Captif, & sa liberté.

Ce ieune Chirurgien est heureusement estonné de voir en vn moment ses liens rompus. Les visages n'ont plus pour luy, que des douceurs, ses ennemis estans deuenus ses amis. Et la ioye fut toute

38 *Relation de la Nouvelle France,*
entiere à Montreal, lors qu'il y ap-
porta luy-mesme les nouuelles de
sa deliurance, & l'asseurance de
la Paix pour toutes les Nations
Iroquoises.

Les Onnontachronnons, qui
l'auoient ramené, voyans tout le
monde assemblé, font monstre de
vint coliers de Porcelene, pour ac-
compagner le principal de leurs
presens, qui estoit nostre prison-
nier remis en liberté.

Le premier colier, estoit pour af-
fermir le May, qu'Onnontio le
grand Capitaine des François,
auoit transporté à Montreal.

Le second, pour remettre en
meilleure humeur Monsieur de
Maisonneufue, iustement indi-
gne pour cette prise iniuste, d'un
de ses nepueux qu'il aimoit.

Le troisieme, luy deuoit seruir

d'un breuage, pour luy faire vomir toute la bile, & tout le poison de son cœur.

Le quatriesme present, estoit pour ietter dans le feu les liens, qui auoient ferré les mains & les bras, du François emmené Captif.

Le cinquiesme, pour rompre les cordes, qui luy auoient ferré les iambes.

Le sixiesme, pour brusler celles, qui l'auoient lié par le milieu du corps.

Le septieme. La Nation des Onnontachronnons brise l'échafaut, où ce captif François a esté exposé.

Le huitiesme, La Nation des Sonnontochronnons le retire de ce lieu d'opprobre.

Le neuuesme, Les Onionenhronnons font le mesme.

Le dixiesme, Les Onneiochronons brulent le bois qui a seruy a cet échafaut malheureux, en sorte que les cendres mesmes n'en restent pas à la posterité, & qu'on en perde la memoire.

L'onzieme present estoit pour reünir dans les mesmes pensées de Paix, l'esprit de nos François, des Hurons & des Algonquins, en cas que la crainte eult donné à quelqu'un de la defiance.

Le douzieme, La nature, dit le Capitaine Iroquois, a parsemé de rochers, & d'ecueils, les Riuieres qui nous ioignent aux François, i oste, dit-il, tous ces brisans, afin que tout nostre commerce en soit plus doux, & plus facile.

Le treisiesme, Le souhaite auant toutes choses, de voir en mon pais vne des robes noires, qui ont en-

és années 1653. & 1654. 41

seigné aux Hurons à honorer vn
Dieu.

Le quatorzième, Nous aurons
du respect pour luy, & tous les
iours nous nettoierons la natte,
sur laquelle il sera couché.

Le quinzième, Nous recevrons
avec amour ses instructions, &
nous voulons adorer celuy qui est
le maistre de nos vies.

Le seizième, Nostre ieunesse
n'aura plus de guerre avec les Fran-
çois; mais comme elle est trop
guerriere, pour quitter cet em-
ploy, vous sçaurés que nous allons
porter nos armes contre les Ehrie-
hronnons (c'est la nation du chat)
dés cet esté nous y conduirons vne
armée. La terre tremble de ce co-
sté là; & tout est calme icy.

Le dixseptieme, si quelque acci-
dent suruenoit, qui peut trauerser

42 *Relation de la Nouvelle France,*
cette Paix, i'auray des aisles pour
voler, & pour me rendre au plu-
stost icy : ma presence arresterà
tous les desordres.

Le dixhuitiesme, i'ouure l'oreil-
le au François, afin qu'il sçache
tout & qu'il entende les nouuelles,
& qu'il m'en donne aduis.

Le dixneufiesme, Nous ne som-
mes plus qu'un, le François, &
moy Onnontachronnon: nos bras
sont enchaînez les vns aux autres,
par un lien d'amour qui voudra le
coupper, sera nostre ennemy com-
mun.

Le vingtieme, Nous ne ferons
rien en cachete, le Soleil en sera
tesmoin, qu'il cesse d'éclairer ce-
luy qui voudroit chercher les te-
nebres: qui hait la lumiere, est in-
digne que le soleil luise pour luy.
Ce furent là les vint presens que

és années 1653. & 1654.

43

nous firent les Iroquois Onnon-
tachronnons, pour affermir la
Paix, qui auoit esté offensée, par
la prise de nostre François.

CHAPITRE IV.

*Vne flotte de canots Hurons & d'Al-
gonquins des nations superieures, al-
liées des François, arriuent à Mont-
real & aux trois Riuieres & y ap-
portes d'heureuses nouuelles au mois
de Juin.*

A Pres la prise du Chirurgien
de Montreal, & auant son
retour de sa Captiuité, lors que
nous estions entre la crainte &
l'esperance, ne sçachans pas quel-
le issue auroit cette affaire, vne
flotte parut de loin, qui descédoit
les rapides & les chutes d'eau, qui

44 *Relation de la Nouvelle France,*
font au dessus de Montreal. On eut
suiet de craindre que ce fust vne
armée ennemie; mais on recon-
nut aux approches, que c'estoiēt
des amys, qui venoient de quatre
cents lieuës loin, nous apporter
des nouvelles de leur Nation, &
en sçauoir des nostres.

Les habitans de Montreal, & des
trois Riuieres, eurent vne double
joye, voyants que ces canots
estoiēt chargez de pelletteries,
que ces nations viennent trai-
ter pour nos denrees françois-
ses.

Ces gents là, estoient partie tion-
nontatehronnons, que nous ap-
pellions autrefois la Nation du pe-
tun; de langue Huronne: & par-
tie Ondataouaouat, de langue Al-
gonquine, que nous appellons les
Cheueux releuez, à cause que leur

cheueleure ne descend point en bas, mais qu'ils font dresser leurs cheueux, comme vne creste qui porte en haut.

Tous ces peuples ont quitté leur ancien pais, & se sont retirez vers les Nations plus esloignées, vers le grand lac, que nous appellons des Puants, à cause qu'ils habitent proche la Mer, qui est salée, & que nos Sauvages appellent l'eau puante, c'est du costé du Nord. La desolation du pais des Hurons, leur ayant fait apprehender vn semblable malheur; & la fureur des Iroquois les ayant poursuivy par tout, ils n'ont pas creu estre asseurez, qu'en s'éloignant, pour ainsi dire, iusques au bout du monde.

Ils y sont en grand nombre, & plus peuplez, que n'ont esté tous ces pais, dont plusieurs ont diuer-

46 *Relation de la Nouvelle France,*
ses langues, qui nous sont inconnues; si faut-il qu'ils connoissent Dieu, & que nous leur annoncions quelque iour ses grandeurs.

Ceux qui nous sont venus trouver, au nombre d'environ six-vint, firent rencontre en leur chemin de quelques Iroquois Sonnontachronnons, & de quelques gents de la Nation du Loup, alliez des Iroquois Anniehronnons, qui estoient à la chasse. Ils en firent treize de Captifs, qu'ils ne voulurent point traiter dans les cruautéz ordinaires; non pas mesme leur lier les bras, ny les mains. Dieu adoucit les cœurs barbares, quand c'est luy qui veut faire la Paix.

Cette troupe victorieuse arrivée heureusement à Montreal, y ayant veu la disposition des esprits, & que tout tendoit à la Paix,

fit present de ses captifs à Sago-chiendagehté , Capitaine Onnontachronnon, qui de son gré y estoit demeuré pour ostage, attendant le retour du François emmené captif.

Cene sont que festins, & que chants de ioye, dans vne douce impatience, qu'on ne voye au plus tost ce retour. Là dessus le François arriua, comme il a esté dit au Chapitre precedent.

Les Iroquois, Onnontachronnon qui le ramenerent, nous firent voir que Dieu trauailloit plus que nous à l'affermissement de cette Paix.

Ils nous aprénent qu'une nouuelle guerre leur estoit suruenue, qui les iette tous dans la crainte. Que les Ehriehronnon arment contre eux, (nous les appellons la Nation

Chat, à cause qu'il y a dans leur pais vne quantité prodigieuse de Chats Sauvages, deux & trois fois plus grands que nos Chats domestiques, (mais d'un beau poil, & précieux,) Ils nous apprennent qu'une bourgade d'Iroquois Sonontoehronons, a esté desiamise à feu, & enleuée dez leur premier abord. Que cette mesme nation a poursuiuy vne de leurs armées, qui reuenoit victorieuse du costé du grand lac des Hurons, & qu'une Compagnie entiere de quatre vingt hommes d'elite, qui estoit leur arriere-garde, y a esté entierement taillée en pieces. Qu'un de leurs plus grands Capitaines, nomme Annenraes a esté pris, & emmené captif, par des courreurs de cette Nation, qui sont venus faire ce coup, quasi aux
portes

portes de leur bourg, en vn mot, que tout est en feu, dans les quatre Nations des Iroquois supérieurs, qui se liguent & qui arment pour repoussier cet ennemy, & que tout cela les oblige à vouloir tout de bon la Paix avec nous, quand mesme ils n'en auroient pas eu les pensées iusqu'alors.

Nous vîmes à ces nouuelles, que Dieu nous secouroit du costé que nous ne l'attendions pas, faisant vne diuersion des armes, & des forces de nos ennemis.

Cette Nation du Chat est grandement peuplée, quelques Hurons qui se sont respandus par tout, lors que leur pais fut ruiné, se sont ioints avec eux, & ont suscité cette guerre, qui donne de la terreur aux Iroquois. On fait estat de deux mille hommes bien agueris,

50 *Relation de la Nouvelle France,*
quoy qu'ils n'aiēt pas d'armes à feu.
Mais ils combattent à la François-
se, essuyants courageusement la
premiere décharge des Iroquois,
qui sont armez de nos fuzils; &
fondants en suite sur eux, avec
vne gresle de fleches, qui sont em-
poisonnées, & qu'ils tirent huit &
dix fois, avant qu'on puisse re-
charger vn fusil.

Quoy qu'il en soit, nous demeu-
rons en Paix, & le Pere Simon le
Moine, retourné tout fresche-
ment des Iroquois superieurs, nous
asseure qu'ils s'armoient pour al-
ler de ce costé là, au nombre de
dix huit cents hommes.

CHAPITRE. V.

Les Iroquis Anniehronnons arriuent à Quebec au mois de Iuillet, & ramènent deux François qu'ils auoient en ostage.

DEux ieunes soldats de la garnison de Quebec, étoient allez au mois de Novembre 1653. avec les Iroquois Anniehronnons, qui nous auoient ramené le Pere Poncet deliuré de sa captiuité. On les auoit enuoiés comme pour seruir d'ostages, ou plustost pour seruir d'un gage asseuré, que nous n'estions vraiment qu'un cœur, les Iroquois, & nous; & que nous voulions viure en confiance les vns avec les autres.

Tout l'hyuer on auoit veu à Montreal, & aux Trois Riuieres,

52 *Relation de la Nouvelle France,*
quantité d'Iroquois de cette Na-
tion, qui toujours confirmoient
la Paix; mais toutes fois quelques
nouvelles suruenues, & mesme
quelques lettres de nos François,
nous iettoient dans la desiance,
iusqu'à ce que sur la fin de l'hy-
uer, vn Capitaine Anniehronnon,
fils d'une mere Iroquoise, & d'un
Pere Hollandois, nous apporta des
lettres du Capitaine du fort d'O-
range, en la Nouvelle Hollande,
& de quelques marchands Hol-
landois, qui nous tesmoignoient
rous, que c'estoit maintenant tout
de bon, qu'ils voyoient les esprits
des sauages leurs alliez, disposez
à la Paix.

Ce mesme Capitaine Iroquois,
fit vn second voyage, pour nous
ramener nos deux François ostages,
selon la parole qu'il nous en auoit

donnée. Ils arriuerent à Quebec, au mois de Iuillet, fort peu de iours apres que le Pere Simon le Moine nous eust quitté, pour son voyage d'Onnontagé, duquel nous parlerons au Chapitre suiuant:

Nous fusmes en peine en ce rencontre, voiant bien qu'il y auroit quelque suiet de ialousie, entre les quatre Nations Iroquoises superieures, & les Iroquois Anniehronnons; chacun d'eux desirant emporter l'honneur de cette ambassade du Pere le Moine, en leur pais. Les Onnontachronnons le desiroient, à cause que c'estoient eux qui auoient porté les premieres nouuelles de la Paix: Les Anniehronnons le souhaitoient, pour ce qu'ils sont les plus proches de nous, & comme les frontieres.

Le Capitaine Anniehronnon en

54 *Relation de la Nouvelle France,*
fit adroitement ses plaintes avec
esprit. N'est-ce pas, dit-il, par la
porte qu'il faut entrer en la mai-
son, & non par la cheminée, &
par le toit de la cabane, sinon
qu'on soit voleur, & qu'on vueil-
le surprendre le monde? Nous ne
faisons qu'une cabane, nous autres
cinq Nations Iroquoises; nous ne
faisons qu'un feu, & nous auons
de tout temps habité sous un mes-
me toit. En effet de tout temps,
ces cinq Nations Iroquoises, s'ap-
pellent dans le nom de leur lan-
gue, qui est Huronne, Hotinnon-
chiendi, c'est à dire la Cabane
acheuée; Comme s'ils n'estoient
qu'une famille, Quoy donc, dit-il,
vous n'entrez pas dans la cabane,
par la porte, qui est au bas estage
de la maison? c'est par nous au-
tres Anniehronnons qu'il falloit
commencer? Vous voulez entrer

és années 1653. & 1654. 55

par le toit , & par la cheminée ,
commençant par l'Onnontachron-
non. N'avez-vous point de crain-
te que la fumée ne vous aveugle ,
nostre feu n'estant pas esteint ? ne
craignez-vous point de tomber du
haut en bas , n'ayant rien de solide
où poser vos demarches ?

Cela obligea Monsieur le Gou-
verneur , de luy faire des presens
exprez , pour l'asseurer que On-
deslonk , (c'est le nom du Pere
Simon le Moine) iroit aussi en
leur pais , pourveu qu'il le peust at-
teindre en chemin , & luy rendre
nos lettres , qui l'informeront de
nos pensées. Ces lettres luy firent
haster son depart : mais le Pere
ayant pris le deuant , ne put pas
estre atteint , & il poursuivit son
voyage , selon le premier dessein
qui auoit esté pris.

CHAPITRE VI.

*Voyage du Pere Simon le Moine dans le
le país des Iroquois Onnontaehron-
nons en Juillet , Aoust,
& Septembre.*

LE second iour du mois de
Juillet, feste de la Visitation
de la tres-sainte Vierge, tousiours
fauorable à nos entreprises, le Pere
Simon le Moine partit de Quebec,
pour le voyage aux Iroquois On-
nontaehronnons. Il passe par les
trois Riuieres , & de là par Mont-
real, où vn ieune homme de bon
courage , & ancien habitant , se
ioint à luy, avec beaucoup de pie-
té. Je suiuray le iournal du Pere ,
pour plus grande facilité.

Le 17. iour de Juillet, iour de S.
Alexis , nous sortons de chez
nous, avec ce grand saint voya-

geur, & nous partons pour vne terre qui nous est inconnüe.

Le 18. suiuanstoufiours le cours de la Riuiere saint Laurens, nous ne trouuons que des brifans, & des torrens impetueux, tout parsemez de rochers & d'escueils.

Le 19. Cette Riuiere se va eslargissant, & fait vn lac agreable à la veüe, de huit ou dix lieues de longueur. Le soir, vne armée de mousquites importunes nous fut vn presage de la pluye, qui nous mouïlla toute la nuit. C'est vn plaisir plus innocent, & plus doux qu'on ne pourroit croire, de n'auoir en ce rencontre aucun abry, sinon des arbres que la nature y a produits depuis la creation du monde.

Le 20. Ce ne sont que des isles, d'yn aspect le plus beau du monde

58 *Relation de la Nouvelle France,*
qui couppent çà & là, cette riuere
tres-paisible. La terre du costé du
Nord, nous paroist excellente :
vers le soleil leuant, c'est vne chaî-
ne de hautes montagnes, que nous
appelasmes de sainte Marguerite.

Le 21. Les isles continuënt. Sur le
soir nous brisons nostre canot d'é-
corce, il pleut toute la nuict. Les
roches toutes nuës, nous seruent
& de lict, & de matelats, & de
tout. Qui a Dieu avec soy, repose
par tout doucement.

Le 22. Les precipices d'eau, qui
pour vn temps, ne sont plus navi-
gables, nous obligent à porter sur
nos espauls nostre petit bagage,
& le canot qui nous portoit. A
l'autre costé du rapide, j'aperçoy
vn troupeau de vaches sauvages,
qui passoient à leur aise, en grand
repos. On en void quelques-fois

en ces endroits , quatre ou cinq cent de compagnie.

Le 23. & le 24. du mois , Nostre pilote s'estant blessé , il falut demeurer en proye aux maringoins , & prendre patience : souuent plus difficile pour les incommoditez qui n'ont point de relasche , ny iour ny nuit, qu'il ne seroit de voir la mort deuant ses yeux.

Le 25. la riuere est si fort rapide , que nous sommes contrainsts de nous ietter dans l'eau , pour traifner apres nous nostre canot parmy les roches , comme vn cavalier qui mettant pied à terre , mene son cheual par la bride ; le soir nous arriuons à l'emboucheure du lac saint Ignace , où les anguilles y sont dans vne quantité prodigieuse.

Le 26. Vn grand vent meslé de

60 *Relation de la Nouvelle France,*
pluye, nous oblige à nous débar-
quer, apres quatre lieuës de che-
min. Vne cabane est bien tost fai-
te, on despouille les arbres voisins
de leur escorce: on les iette sur des
perches, qu'on plante en terre de
part & d'autre, les faisant appro-
cher en forme de berceau; & voilà
vostre maison bastie. L'ambition
n'a point d'entrée dans ce palais,
il ne laissa pas de nous estre autant
agreable, que si le toit en eust esté
tout d'or.

Le 27. Nous costoyons les riuages
du lac, ce sont rochers de part &
d'autre, d'une hauteur excessiue,
tantost effroyables, tantost agrea-
bles à la veüe, c'est merueille com-
me de grans arbres peuuent trou-
uer racine parmy tant de rochers.

Le 28. Ce ne sont que tonnerres,
& qu'esclairs, & vn deluge d'une

pluie, qui nous oblige à nous tenir à l'abry de nostre canot, qui nous sert de maison, le renuerfant sur nous.

Le 29. & 30. de Iuillet, vn orage de vent continuë qui nous arreste à l'entrée d'vn grand lac, nommé Ontario: nous l'appellons le lac des Iroquois, à cause que du costé du midy, ils y ont leurs bourgades. Les Hurons sont de l'autre costé, plus auant dans les terres. Ce lac a de largeur vint lieuës: sa longueur, d'environ quarante.

Le 31. iour de saint Ignace, la pluie & les vents nous obligent à chercher des chemins perdus. Nous trauersons de longues isles, portans nostre bagage, nos provisions, & le canot sur nos espaules. Ce chemin semble long à vn pauvre homme bien fatigué.

62 *Relation de la Nouvelle France,*

Le premier iour du mois d'Aoust, quelques pescheurs Iroquois, nous ayants apperceu de loin, s'atroupent pour nous receuoir. Vn d'eux accourt à nous, auançant vne demie lieue, pour nous dire les premieres nouuelles, & l'estat du pais. C'est vn captif Huró, & bon Chrestien, que i'auois autresfois instruit, dans vn hyuernemét que ie fis avec les Sauvages : Cepauure garçon ne pouuoit croire que ce fust celuy qu'il n'esperoit iamais reuoir. Nous débarquons à vn petit village de pescheurs. On se presse à qui portera tout nostre bagage. Mais hélas ce ne sont quasi que femmes Hurones & la plus part Chrestiennes, autre fois riches, & à leur aise, que la captiuité a rendu seruantes. Elles me demandent à prier Dieu, & i'eus la consola-

és années 1653. & 1654.

65

tion de confesser là à mon aise
nostre ancien hoste de la Na-
tion du petun , Hostagehtak: ses
sentimens & sa deuotion me tire-
rent les larmes des yeux. C'est vn
fruit des trauaux du Pere Charles
Garnier , ce saint Missionnaire,
dont la mort a esté si precieuse de-
uant Dieu.

Le second iour d'Aoust. Nous
marchons dans les bois enuiron
douze ou quinze lieuës. On caba-
ne où le iour finit.

Le 3. sur le midy, nous nous trou-
uons sur les bords d'une riuere
large de cent ou six-vingt pas; au
delà de laquelle il y auoit vn ha-
meau de pescheurs. Vn Iroquois
que i'auois autres-fois caressé à
Montreal, me fait passer en son
canot, & par honneur il me por-
te sur ses espauls, ne voulant pas

64 *Relation de la Nouvelle France,*
permettre que ie mette le pied en
l'eau. Tout le monde m'accueille
avec ioye, & ces pauvres gents
m'érichissent de leur pauvreté. On
me conduit à vn autre bourg esloi-
gné d'une lieüe, où vn ieune hom-
me de consideration, me fait faire
festin, à cause que ie porte le nom
de son Pere, Ondessonk. Les Capi-
taines nous viennent faire leurs
harangues, les vns apres les autres.
Ie baptize de petites squeletes, qui
n'attendoient peut-estre, que cer-
te goutte du precieux sang de Je-
sus-Christ.

Le 4. Ils me demandent, pour-
quoy nous sommes vetus de noir?
& ie prens occasion de leur parler
de nos mysteres avec vne grande
attention. On m'apporte vn petit
moribond, que ie nomme Domi-
nique. Le temps n'est plus auquel
on

On nous cachoit ces petits innocens. On me prenoit pour vn grand medecin, n'ayant pour tout remede qu'une pincée de succe, à donner à ces languissans. Nous poursuivons nostre chemin ; au milieu nous trouuons nostre disné qui nous attend. C'est le nepueu du premier Capitaine du païs, qui me doit loger en sa cabane, qui est député par son oncle, pour nous faire escorte, nous apportant tout ce que la saison leur auoit pû fournir de plus grandes douceurs, sur tout du pain de bled d'inde nouveau, & des espys que nous faisons rostir au feu. Nous couchons encore ce iour là à la belle estoile.

Le 5. Nous eusmes à faire quatre lieues auant que d'arriuer au principal bourg Onnontagé. Dans les chemins ce ne sont qu'allans, & venans, qui me viennent donner

le bon-iour. L'un me traite de frere , l'autre d'oncle , l'autre de cousin , iamaïs ie n'eus vne parenté si nombreuse. A vn quart de lieuë du bourg , ie commençay vne harangue , qui me donna bien du credit : ie nommois tous les Capitaines, les familles, & les personnes cōsiderables; & d'une voix traïsante , en ton de Capitaine. Je leur disois que la paix marchoit avec moy , que i'escartois la guerre dans les nations plus éloignées, & que la ioye m'accompagnoit. Deux Capitaines me firent leur harangue à mon entree: mais avec vne ioye , & vn espanouissement de visage, que iamaïs ie n'auois veu dans les sauuages. Hommes , femmes , & enfans , tout estoit dans le respect , & dans l'amour.

La nuit , ie fais assembler les prin-

cipaux, pour leur faire deux presens. Le premier, pour leur essuyer le visage, à ce qu'ils me regardent de bon œil, & que jamais ie ne voye sur leur front aucune marque de tristesse. Le second, pour leur vüider le peu de fiel, qu'ils auroient encore sur le cœur. Apres plusieurs autres entretiens, ils se retirent pour consulter ensemble, & enfin, ils respondent à mes presens, par deux autres presens plus riches que les miens.

Le 6. on m'appelle de diuers endroits, pour donner de ma medecine à de petits languissans, & ethiques. l'en baptizay quelques-uns. le confessay de nos anciens Chrestiens Hurons, & ie trouuay que Dieu est partout, & qu'il se plaist à trauailler luy-mesme, dans des cœurs où la foy a regné.

68 *Relation de la Nouvelle France;*
Il s'y bastit vn temple , où il est
adoré avec esprit & verité; qu'il en
soit beny à iamais.

Le soir , nostre hôte me tire à part , & me dit avec bien de l'affection , qu'il nous auoit toujours aimé , qu'enfin il auoit le cœur content, voyant que toutes les bandes de sa nation ne demandoient que la Paix: que depuis peu le Sonnochochon, les estoit venu exhorter à bien gerer cette affaire pour la Paix, & que pour cela il auoit fait de beaux presens, que l'Onioehronnon auoit apporté trois colliers pour ce suiet , que l'Onneiochonnon se tenoit heureux d'auoir esté desembarrassé d'une mauuaise affaire par son moien, & qu'il ne vouloit plus que la Paix: que sans doute l'Annichronnon suiuiroit les autres , & qu'ainsi ie

prisse courage, puisque ie portois
auec moy le bon-heur de toute la
terre.

Le 7. vne bonne Chrestienne,
nōmée Terefe, captiue Huronne,
voulāt me répandre son cœur hors
du bruit, & dās le silence, m'inuita
de l'aller voir en vne cabane des
champs, où elle demeuroit. Mon
Dieu, quelle douce consolation
de voir tant de foy en des cœurs
sauuages, dans la Captiuité, &
sans autre assistance que du ciel!
Dieu fait des Apostres par tout,
Cette bonne Chrestienne auoit
auec foy vne ieune captiue de
quinze à seize ans, de la Nation
Neutre, qu'elle aymoit comme sa
propre fille. Elle l'auoit si bien in-
struite, dans les mysteres de la foy,
& dans les sentimens de Pieté,
dans les prieres qu'elles faisoient

70 *Relation de la Nouvelle France,*
ensemble en cette sainte solitude,
que i'en fus tout surpris. Hé, ma
sœur luy disois-je, pourquoi ne l'as
tu pas baptizée, puis qu'elle a la foy
comme toy, & qu'elle est Chre-
stienne en ses meurs, & qu'elle
veut mourir Chrestienne? Helas,
mon frere, me respondit cette
heureuse captiue, ie ne croiois pas
qu'il me fust permis de baptiser,
sinon dans le danger de mort: ba-
ptise la maintenant toy-mesme,
puisque tu l'en iuges digne, & don-
ne luy mon nom. Ce fut là le pre-
mier baptesme d'adultes fait à On-
nontagé, dont nous sommes rede-
uables à la Pieté d'une Huronne.
La ioye que i'en conceu, estoit ca-
pable d'essuyer toutes mes fatigues
passées. Quand Dieu dispose vn
ame, vn coup de salut est bien-
tost fait.

Quasi en mesme temps on m'appelle pour vn malade, qui n'a plus que les os: c'est vn vlcere qui le mange, pour vn coup de fusil mal pansé. le luy parle de Dieu, des esperances d'vne vie eternelle, & des veritez de la foy; mais helas, les paroles du ciel n'entrent pas dans ce cœur tout bouffy d'orgueil, il ne songe qu'à la vie presente, & quoy qu'il me tesmoigne de l'amour, il n'en peut conceuoir pour Dieu!

Le 8. le baptise trois petits moribonds. le donne & ie reçois la consolation, me voyant au milieu d'une Eglise de Chrestiens tous formez. Les vns viennent se confesser, les autres me racontent toutes leurs miseres, & ensemble le bonheur qui leur reste, que leur Foy ne soit point captiue, dans leur captiuité; & de sçauoir qu'offrans à

72 *Relation de la Nouvelle France,*
Dieu leurs gemissemens & leurs
larmes, Dieu a les yeux sur eux, &
que sa sainte Prouidence a pour
eux des amours de mere, & qu'ils
seront libres d'as le ciel. l'après que
plusieurs, qu'on auoit fait mourir
cruellement à petit feu, se conso-
loient dans le plus fort de leurs
tourmens, ayans iusqu'au dernier
sôuspir, le saint nom de Iesus, &
dans la bouche, & dans le cœur.
Je m'enqueste de tous ceux de no-
stre ancienne connoissance, pour
sçauoir leur fortune; & ce m'est
vne occasion de benir Dieu, de
voir qu'il est par tout luy-mesme,
autant parmy les Iroquois, que
dans les païs des Hurons. l'auois
ordre de sçauoir qu'estoit deuenüe
vne ieune femme Chrestienne
Hurone, nommée Caterine Sko-
uatenhré, qu'autrefois nous appel-

lions la Religieuse, à cause de sa grande pieté, & d'une modestie aussi rare, qu'on peut en desirer en une fille route à Dieu. Sa sœur me dit, qu'elle estoit morte en priant Dieu, ne l'ayant jamais oublié tout le cours de sa maladie, qui auoit esté longue. Un peu deuant sa mort: Ma sœur, ie m'en vay au ciel, luy dit-elle, car Iesus est bon, qui me fera misericorde. Pour toy si tu me veux suiure, & nous reuoir au ciel, cherys ta foy plus que la vie, fuy le peché comme la mort; & si par malheur tu y tombes, souuiens toy que Iesus est bon, demande luy pardon, & dis luy que tu veux l'aymer. Ces dernieres paroles sont tellement demeurees empreintes dans l'esprit de cette sœur, qui luy a suruescu, qu'elle ne peut en perdre la me-

74 *Relation de la Nouvelle France,*
moire. Cette bonne Ame ne pou-
uoit assez me voir, pour entendre
parler de Dieu, & se consoler avec
moy des esperances du Paradis.

Le 9. sur le midy, arriue vn cry
funeste, de trois de leurs chasseurs
massacrés par la Nation du chat, à
yne iournée de là. C'est à dire que
la guerre s'allume de ce costé la

CHAPITRE VII.

*Conseil general pour la Paix, avec les
quatre Nations Iroquoises; & en
suite le retour du Pere Simon le
Moine de son voyage.*

LE dixiesme iour d'Aoust, les
deputez estans arriuez des
trois Nations voisines, apres les
crys ordinaires des Capitaines, à
ce que tout le monde s'assemblast
dans la cabane d'Ondessonk; i'ou-

Je fis cette action (dit le Pere continuant son Journal) par vne priere publique, que ie fis à genoux, & à haute voix, le tout en langue Huronne. Je m'adressois au grand maistre du ciel & de la terre, afin qu'il nous inspirast ce qui seroit pour sa gloire, & pour nostre bien: Je maudissois tous les Demons d'enfer, qui sont des esprits de diuision; & ie priois les Anges tutelaires de tout le pais, de parler au cœur de ceux qui m'escoutoient, lors que ma parole leur frapperoit l'oreille.

Je les estonnay grandement, quand ils entendirent que ie les nommois tous par Nations, par bandes, par familles, & chaque personne en particulier, qui estoit vn peu considerable, & le tout à la faueur de mon escrit; qui leur fut

76 *Relation de la Nouvelle France,*
vne chose autant rauissante, que
nouuelle, ie leur dy que i'auois
dix-neuf paroles à leur porter.

La premiere que c'estoit Onnon-
tio, Monsieur de Lauson, Gou-
uerneur de la nouuelle France, qui
parloit par ma bouche, & en suite
les Hurons, & les Algonquins, au-
tant que les François, puis que tou-
tes les trois Nations auoient pour
leur grand Capitaine Onnontio.
Vn grand colier de Porcelene, cent
petits tuyaux ou canons de verre
rouge qui sont les diamás du pais,
& vne peau d'orignac, passée: Ces
trois presens, ne faisoient qu'une
parole.

Ma seconde parole fut pour
coupper les liens des huit captifs
de Sonnontouan, pris par nos Al-
liez, & amenez à Montreal, com-
me il a esté dit cy deuant au cha-
pitre quatriesme.

La troisieme estoit pour rompre aussi les liens de ceux de la Nation du Loup, pris enuiron le mesme temps.

La quatrieme, pour remercier ceux d'Onnontagé de nous auoir ramené nostre captif.

Le cinquiesme present estoit pour remercier ceux de Sonnon-touan, de l'auoir retiré de dessus l'échafaut.

Le sixiesme, pour les Iroquois Onioenhronons, d'y auoir aussi contribué.

Le septiesme, pour les On-neioehronnons, d'auoir rompu les liens qui le faisoient captif.

Le huitiesme, neuuesme, dixiesme & vnzieme present pour donner à ces quatre Nations Iroquoises, vne hache à chacune, pour la Nouvelle guerre où ils sont enga-

78 *Relation de la Nouvelle France,*
gez avec la Nation du Chat.

Le douzième present estoit pour refaire la teste au Sonnontochronon, qui y a perdu de son monde.

Le treizième, pour raffermir sa palissade, c'est à dire, afin qu'il se tienne en estat de deffense contre cet ennemy.

Le quatorzième, pour luy matachier le visage; car icy c'est la coutume des guerriers, de iamais n'aller au combat, qu'ils n'ayent le visage peint, qui de noir, qui de rouge qui de diuerses autres couleurs, chacun ayant en cela, cōme des liurées particulieres, auxquelles ils s'attachent iusques à la mort.

Le quinzième, pour rassembler en vne toutes leurs pensées, ie faisois trois presens pour ce seul article, vn colier de porcelaine, des pe-

tits Canons de verre & vne peau
d'ornac.

Le seiziesme. l'ouurois la porte
d'Annonchiassé à toutes les Na-
tions, c'est à dire qu'ils seroient les
bien-venus chez nous.

Le dixseptiesme. Je les exhortois
à se faire instruire des veritez de
nostre foy, & ie fy trois presens
pour cet article.

Le dixhuitiesme. Je leur deman-
dois que dores-enauant ils ne dres-
sissent plus d'embuches aux Na-
tions Algonquines, & Hurones,
qui voudroient nous venir trou-
uer en nos habitations François-
ses. Je fy trois presens pour cet
article.

Enfin par le dixneufiesme pre-
sent, j'essuyay les larmes de toute
la ieunesse guerriere, sur la mort
de leur grand Capitaine Annen-

80 *Relation de la Nouvelle France,*
craos, depuis peu Captif par la Na-
tion du chat.

A chacun de mes presens, ils pouissoient du profond de la poitrine vne acclamation puissante, pour tesmoignage de leur ioye. Je fus bien l'espace de deux heures à faire toute ma harangue, en ton de Capitaine, me promenant, à leur ordinaire, comme vn acteur sur vn theatre.

Après cela ils s'attroupent par Nations, & par bandes, y appellant vn Anniehronnon, qui de bon rencontre s'y trouua. Ils consultent par entr'eux, l'espace de plus de deux autres heures. Enfin ils me rappellent parmy eux, & me donnent seance en vn lieu honorable.

Celuy des Capitaines qui est la langue du pais, & comme l'orateur,
repete

repete fidelement le pressis de toutes mes paroles. Puis se mettans tous à chanter, en signe de reiouissance, il me dirent que ie priasse Dieu de mon costé, ce que ie fis tres-volontiers.

Après ces chansons, il me parle au nom de sa nation, 1. Il remercie Onnontio des bonnes volonteze qu'il a pour eux, & produit pour cet effet deux grans coliers de Porcelaine.

2. Au nom des Iroquois Anniehronnons, il nous remercie d'a-voir fait donner la vie, à cinq de leurs alliez, de la Nation du Loup, deux autres colliers pour cela,

3. Au nom des Iroquois Sonno-toehronnons, il nous remercie d'a-voir retiré du feu cinq de leurs gents; deux autres colliers: suiuent à chaque present des acclamations

82 *Relation de la Nouvelle France,*
de toute l'assemblée.

Vn autre Capitaine de la Nation des Onneiocrónons se leue : Onnontio, dit-il, parlant de monsieur de Lauson nostre Gouverneur absent, Onnontio, tu es le soubstien de la terre, ton esprit est vn esprit de Paix, & tes paroles adoucissent les cœurs les plus rebeles. Apres d'autres louanges, qu'il disoit d'vn ton animé d'amour, & de respect. Il fait paroistre quatre grands colliers, pour remercier Onnontio, de ce qu'il les auoit encouragez à combattre genereusement contre leurs nouueaux ennemis de la Nation du chat, & de ce qu'il les auoit exhortez à n'auoir plus iamais de guerre contre les François. Ta voix, dit-il, Onnontio est admirable, de produire en mesme temps dedans mon cœur deux ef-

fets tout contraires, tu m'animes à la guerre, & adoucis mon cœur par des pensées de Paix, tu es & pacifique & grand guerrier, bien faisant à ceux que tu aimes, & terrible à tes ennemis. Nous voulons tous que tu nous aimes, & nous aimerons les François à cause de toy.

Pour conclure ces remerciemens, le Capitaine Onnontaerrhonnon prend la parole. Escoute, Ondesfonk, me dit-il, Cinq Nations entieres te parlent par ma bouche; j'ay dans mon cœur les sentimens de toutes les Nations Iroquoises, & ma langue est fidelle à mon cœur. Tu diras à Onnontio quatre choses, qui est le sommaire de tous nos Conseils.

1. Nous voulons reconnoistre celui dont tu nous as parlé, qui est le maistre de nos vies, qui nous est inconnu.

2. Le May de toutes nos affaires, est aujourd'huy planté à Onnontagé, il vouloit dire que ce seroit dorenauant le lieu des assemblées, & des pourparlers pour la Paix.

3. Nous vous coniurons de choisir sur les riuages de nostre grand lac, vne place qui vous doine estre auantageuse, pour y bastir vne habitation de François. Mettez vous dans le cœur du pais, puisque vous deuez posseder nostre cœur. Là nous irons nous faire instruire : & de là vous pourrez vous resprendre par tout. Ayez pour nous des soins de Peres, & nous aurons pour vous des soumissions d'enfants.

4. Nous sommes engagez dans de nouvelles guerres, Onnontio nous y anime. Nous n'aurons plus que des pensées de Paix pour luy.

Ils auoient reserué leurs plus ri-

és années 1653. & 1654. 85

ches presens pour ces quatre dernières paroles; mais ce que ie puis asseurer, c'est que leur visage parloit plus que leur langue, & que la ioyes'y faisoit voir, avec tant de douceur, que mon cœur en estoit comblé.

Ce qui me paroist de plus aimable en tout cecy, c'est que tous nos Chrestiens Hurons, & les femmes Captiues ont allumé ce feu, qui brusle le cœur des Iroquois. On leur a dit tant de biens de nous, & on leur a parlé si souuent des grands biens de la Foy, qu'ils l'estiment sans la connoistre, & qu'ils nous aiment, dans l'esperance que nous ferons pour eux, ce que nous auons esté aux Hurons.

Pour reuenir à la suite du iournal du Pere, L'onzième iour d'Aoust. Ce ne sont, dit le

86 *Rélation de la Nouvelle France,*
Pere, que des festins, & des ré-
jouissances par tout. Mais la nuit,
il survint vn mal-heur: Le feu s'e-
stant pris en vne cabane, on ne
sçait pas comment, vn vent impe-
tueux porte les flames sur les au-
tres, & en moins de deux heures,
on en voit plus de vint reduites en
cendre, & le reste du bourg en
danger d'estre consommé. Dieu
nonobstant conserua les esprits
dans la ioye du iour precedent, &
leur cœur aussi calme pour moy,
que si ce malheur ne fust point ar-
riué.

Le 12. Nos captiues Chestiennes,
voulans se confesser auant mon
depart, me donnerent de l'exerci-
ce; ou plustost le repos que ie sou-
haittois. Je baptizay vne petite
fille de quatre ans, qui se mou-
roit. Je recouray de la main d'vn

de ces barbares, le nouveau testament du feu Pere Iean de Brebeuf, qu'ils ont fait mourir cruellement, il y a cinq ans, & vn autre petit liuret de deuotion, qui auoit seruy au feu Pere Charles Garnier, qu'ils ont eux-mesme tué, il y a quatre ans; Ces deux Peres estoient en leur Mission, lorsque cette heureuse mort leur arriua, pour recompense des travaux de plusieurs années, qu'ils auoient saintement employées en toutes ces contrées. Pour moy, qui suis témoin de la sainteté de leur vie, & de la gloire de leur mort, ie feray plus d'estat toute ma vie de ces deux petits liurets, leurs aimables reliques, que si i'auois rencontré quelque mine d'or, ou d'argent.

Le 13. au suiet de l'embrasement arriué, pour suiure la coustume

88 *Relation de la Nouvelle France,*
des amys en pareils rencontres,
ayant conuoqué le conseil, ie leur
fis deux presens pour les consoler.
Et pour ce dessein, au nom d'A-
chiendassé (c'est le nom du su-
perieur general de toutes les Mis-
sions de nostre Compagnie en ces
contrées) Premièrement, ie leur
plantay le premier pieu, pour com-
mencer vne cabane, c'est comme
si en france, on mettoit la premie-
re pierre d'une maison qu'on veut
bastir. Mon second present fut,
pour ietter la premiere escorce qui
deuoit couvrir la cabane. Ce tes-
moignage d'affection les conten-
ta, & trois de leurs Capitaines,
m'en remercierent publique-
ment, par des harangues qu'on ne
croiroit pas pouvoir partir de l'es-
prit de ceux qu'on appelle sauva-
ges.

Le 14. vn ieune Capitaine, qu'ils auoient fait le chef d'une leuée de dix-huit cents hommes, qui deuoient au plustost partir pour aller en guerre contre la Nation du chat, me presse de le baptiser. Il y auoit quelques iours que ie luy donnois quelque instruction. Et comme ie voulois luy faire estimer cette grace, en la differant à quelque autre voyage: Hé quoy mon frere, me dit-il, si i'ay la Foy dès aujourd'huy, ne puis-ie pas estre Chrestien? as-tu du pouuoir sur la mort, pour luy deffendre de m'attaquer auant tes ordres? Les fleches de nos ennemis feront-elles emoussées pour moy? Veux-tu qu'à chaque pas que ie feray dans le combat, ie craigne plus l'enfer que la mort? Si tu ne me baptise, ie feray sans courage, & ie n'osc-

90 *Relation de la Nouvelle France,*
ray aller aux coups. Baptise moy,
car ie veux t'obeir, & ie te donne
ma parole, que ie veux viure &
mourir Chrestien.

Le 15. De grand matin, ie me-
ne mon Catechumene à l'es-
cart, & voyant son cœur sainte-
ment disposé au baptisme, ie luy
donne le nom de mon cher Com-
pagnon de voyage, Iean Baptiste.
Il m'embrasse, & me respand son
cœur avec amour, & me proteste
que Iesus sera toute son esperance,
& son tour.

Cependant on me cherche par-
tout, pour me faire faire mon fe-
stin d'Adieu, tous les considera-
bles, hommes & femmes, estans
inuitez en nostre cabane, en mon
nom, selon la coustume du pais,
à fin d'honorer mon depart.

Nous partons en bonne compa-

gnie, apres les crys publics des Capitaines, c'est à qui se chargera de nostre petit meuble.

A vne demie lieuë de là, nous trouuons vne troupe d'anciens, tous gents de conseil, qui m'attendoient pour me dire Adieu dans l'esperance de mon retour qu'ils tesmoignent souhaiter avec empressement.

Le 16. Nous arriuons à l'entrée d'un petit lac, dans un grand bassin à demy seché, nous goustons de l'eau d'une source qu'ils n'osent boire, disants qu'il y a dedans un demon qui la rend puante; en ayant gousté, ie trouuay que c'estoit vne fontaine d'eau salée: & en effet nous en fismes du sel, aussi naturel que celuy de la mer; dont nous portôs vne môtte à Quebec. Ce lac est très poissonneux en trui-

92 *Relation de la Nouvelle France,*
res saulmōnées, & autres poissons.

Le 17. Nous entrons dans leur riuere, & à vn quart de lieuë, nous rencontrons à gauche, celle de Sonnontouan, qui grossit celle-cy, elle meine disent-ils, à Onioen, & à Sonnontouan en deux couchées. A trois lieuës de là de tres-beau chemin, nous quittons à la main droite la Riuere d'Oneiour, laquelle nous paroist bien profonde. Enfin vne bonnelieuë plus bas, nous rencontrons vne bature qui donne le nom à vn village de pescheurs. l'y trouuedes nos Chrestiens, & Chrestiennes Huronnes, que ie n'auois pas encore veu. le les confesse avec bien de la satisfaction de part & d'autre.

Le 18, tandis que mes matelots mettent leurs canots en estat, vne de ces bonnes Chrestiennes, me

fit baptizer son enfant de deux ans; afin, disoit-elle, qu'il aille au ciel, avec sa petite sœur autresfois baptisée, que ces gens cy m'ont massacré. I'é baptizay vn autre petit innocent qui haletoit à la mort.

Le 19. Nous aduançons chemin, sur la mesme Riuiere, qui est d'vne belle largeur, & profonde partout; a la reserue de quelques batoures, où il faut se mettre en l'au, & traifner le canot, crainte que les roches ne le brisent.

Le 20. Nous arriuons au grand lac, Ontario, appelé le lac des Iroquois,

Le 21. Ce lac est en furie, à cause de la rage des vents, apres vn orage de pluie.

Le 22. Costoyans doucement les riuies de ce grand lac, mes matelots tuent d'vn coup de fusil vn grand

94 *Relation de la Nouvelle France,*
Cerf. Nous nous contentons de
leur voir faire leurs grillades mon
compagnon & moy, estant Same-
dy, iour d'abstinence pour nous.

Le 23. Nous arriuons au lieu
qu'on nous destine pour nostre
maison, & pour vne habitation
Françoise. Ce sont des prairies ra-
uissantes, bonne pesche, vn abord
de toutes les Nations. Là i'y trou-
uay de nouveaux Chrestiens, qui
se confessèrent, & qui me donne-
rent de la deuotion dans leurs sen-
timens de Pieté.

Le 24. & le 25. le vent nous ayant
arresté, le 26. nos matelots, s'estant
embarquez deuant que la tempe-
ste fust appaisée, vn de nos canots
s'entrouurit, & nous pensames être
abyfmez; mais enfin nous nous iet-
tames dans vne isle, & là nous nous
sechasmes tout à loisir.

es années 1653. & 1654.

99

Le 27. sur le soir, vn petit calme nous donne temps pour regagner la terre ferme.

Le 28 & le 29. La chasse arreste mes matelots, qui sont en la meilleure humeur du monde : car la chair est le Paradis d'un homme de chair.

Le 30. & le dernier du mois d'Aoust, la pluye & le vent incommodent beaucoup de pauvres voyageurs, qui ayans travaillé le iour, sont mal menez toute la nuit.

Le premier iour de Septembre, iamais ie ne vy tant de bestes-fauues mais nous n'auions pas enuie de chasser, mon cōpagnō en tuë trois quasi malgré luy, quel dommage, car nous laissasmes là toute la venaison, à la referue des peaux, & de quelques morceaux plus delicats.

Le deuxiesme du mois, faisans

96 *Relation de la Nouvelle France,*
chemin sur de grandes prairies ;
nous voyons en diuers endroits de
grands troupeaux de bœufs & de
vaches fauuges, leurs cornes sont
en quelque façon approchantes
des rameures d'un cerf.

Le 3. & le 4. Nostre chasse ne nous
quitte point, il semble que le gi-
bier & la venaison nous suit par-
tout. Des bades de vingt vaches se
iettent à l'eau, quasi pour nous ve-
nir au rencontre, on en tuë à coups
de hache en se iouant.

Le 5. Nous faisons en vn iour le
chemin, qui nous auoit arrestez
deux grandes iournées montant
par des rapides & par des brisans.

Le 6. Nostre fault S. Louis fait
peur à mes gents. Ils me mettent
à terre quatre lieues au dessus de
l'habitation de Montreal, & Dieu
me donne assez de forces pour ar-
riuer

riuer auant midy, & celebrer la Sainte Messe, dont i'auois esté priué durant tout mon voyage.

Le 7. le passé outre, & descend pour les trois Riuieres, où mes matelots desirent aller.

Nous n'arriuasmes à Quebec, que l'onzième iour du mois de Septembre de cette année 1654.

CHAPITRE VIII.

Dessain pris d'aller au Printemps de l'année prochaine commencer une habitation dans le grand Lac des Iroquois, & d'y faire une Mission pour tous ces peuples.

IL n'appartient qu'à Dieu de tirer la lumiere du milieu des tenebres, & de faire naistre de l'aigreur de la guerre & de la trahison, la douceur de la Paix & de

98 *Relation de la Nouvelle France,*
l'amour: en vn mot de faire toutes choses, du neant; de produire au milieu du desespoir vne douce esperance.

Nous auons souhaité de tout temps le Salut de nos ennemis, lors mesme que leur cruauté s'opposoit au salut de toutes ces contrées. C'est leur fureur qui a desolé les pais des Nations Algonquines, & Hurones, en mesme temps qu'ils auoient commencé de faire vn Peuple tout Chrestien: Ils ont brulé cruellement & les pasteurs, & le troupeau: Mais enfin le sang des martyrs s'est fait entendre dans le ciel: & nous nous voyons appelez pour annoncer la Foy, par ces cruels Barbares, qui sembloient n'estre au monde que pour s'y opposer. En vn mot, les Iroquois nous pressent de les aller instrui-

re; & ils demandent avec instance, qu'on aille bastir sur leur Lac vne habitation de François, qui leur serue d'azile, & qui soit vn lien de paix entre eux & nous.

Après auoir veu leurs poursuites, leurs Ambassades & leurs pressens pour cet effet: & les plus sages des François ayans iugé d'ailleurs, que c'estoit l'ynique moien de former vne Paix veritable avec ces Nations Infideles: Monsieur nostre Gouverneur s'est heureusement veu obligé, de leur accorder leurs desirs, & les nostres.

Cette parole leur en ayant esté donnée pour le Printemps prochain, leur cœur n'a pû se comprendre de ioye, leur visage nous a parlé plus que leur langue, & Dieu nous a fait esperer qu'il ti-

100 *Relation de la Nouvelle France,*
reroit sa gloire, & nostre bien, du
costé de nos ennemys, *salutem ex*
inimicis nostris.

N'y eust-il que les Enfans à baptiser, qui meurent tous les iours sans baptesme, c'est vn gain asseuré pour le ciel, qui vaut plus que dix mille vies, n'y eust-il que le secours qu'attend de nous vne Eglise Captiue, y ayant plus de mille Chrestiens, hommes & femmes Huronnes, qui n'y ont pas perdu leur foy, apres auoir perdu leur pais, & leur liberté, leurs parens, & leur vie; nous serions obligez, estans leur Anges tutelaires, de passer à trauers les flammes, pour leur rendre les mains, & pour les conduire au ciel. Mais puisque Dieu nous donne occasion d'esperer quelque chose de plus auantageux pour sa gloire, que tout cela;

& que mesme les Infideles nous
coniurent de les vouloir rendre
Chrestiens; il n'est pas en nostre
pouuoir de leur refuser cette gra-
ce, à moins que d'estre infideles
nous-mesmes à la grace de Dieu.

Monsieur nostre Gouverneur
voyant cette porte ouuerte au
cours de l'Euangile, & ce moien
si important, & l'vnique qui
nous paroisse pour conseruer la
Paix; a desia donné Commis-
sion à vne personne de merite,
pour commander cette nouvelle
habitation. Nos François, à l'en-
uy l'vn del'autre, se presentent de
tous costez, pour se ioindre de la
partie, & le zele dans lequel on
s'y porte, nous fait assez connoi-
stre, que Dieu y opere plus que
nous

Les Iroquois viendront eux-mes-

102 *Relation de la Nouvelle France,*
mes nous querir dans leurs grands
canots, apres que les neges, & les
glaces seront fonduës. Ils nous
doiuent amener de leurs filles en
ostage, que les Meres Ursulines re-
cueilliront avec amour, en leur
maison de charité, pour en faire
autant de Chrestiennes. Le Pere
Simon le Moine est pour retour-
ner dez cet automne, afin d'yuer-
ner avec eux, & aduancer toûjours
d'autant les affaires de Dieu, & la
conuersion de ces peuples.

Le lieu qu'il nous ont destiné
pour cette habitation nouuelle,
est sur le grand lac des Iroquois,
qui se respandent du costé du mi-
dy. Le costé du Septentrion, ti-
rant vers l'occident, est l'ancien
païs des Hurons, & le plus court
chemin, pour entretenir le com-
merce & de la foy, & du negoce

es années 1653. & 1654.

103

avec quantité de Nations tres peuplées, qui nous sont allies de tout temps , & qui ont quantité d'alliances, avec d'autres Nations plus esloignées; dont quelques-vnes ont desia des commencemens de la Foy , & toutes sont pour la recevoir quelque iour, puis qu'il faut que Iesus-Christ soit enfin adoré par toutes les nations du monde.

Le peu d'ouuriers que nous sommes, pour vn pais si estendu, fait que nous leuons les mains au ciel, pour demander secours: Quiconque aime sa vie, de l'amour qu'il la faut aimer, & la veut perdre saintement, trouuerra dans ces Missions abandonnées les desirs de son cœur.

CHAPITRE IX.

*Estat de la Colonie Huronne
dans l'Isle d'Or-
leans.*

QVand nous quittasmes les Hurons , l'année 1650. le pais estant desolé par la cruauté des Iroquois : nostre veuë fut qu'amenant avec nous les familles Chrestiennes , qui pourroient nous accompagner , nous sauuerions du moins quelques restes d'un peuple que Dieu auoit appelé à la Foy, qui seruiroit vn iour de semëce, pour repeupler le Christianisme en toutes ces contrées, Ceux qui se dissipèrent ailleurs, ont trouué la mort qu'ils fuyoient, la plus grande part n'ayans pû s'escarter si loin de la fureur des Iro-

quois , qu'ils n'ayent esté comme
autant de victimes , les vns brulés
cruellement , les autres tuez sur la
place , ou emmenez captifs , & mes-
me il est arriué que plusieurs se sont
massacrez les vns les autres , apres
s'estre sauuez de l'ennemy ; n'y
ayant plus entre-eux aucune for-
me de Republique , ny mesme
aucune societé de vie ; chacun se
pouuoiant comme il pouuoit , &
les plus forts opprimans les plus
foibles , pour voler le peu qu'ils
auoient .

Ceux qui nous ont suiuy , ont
trouué avec nous le salut de l'ame
& du corps. Pour les fixer en vn
lieu arresté (les Hurons n'estans
pas vne Nation errante) on leur as-
signa vn departement separé des
François , dans l'isle d'Orleans , à
la veuë de Quebec , enuiron deux

106 *Relation de la Nouvelle France,*
lieuës au deffous. Il fallut les nour-
rir, hommes, & enfans, les deux
premieres années, il fallut leur ba-
ptir vne Eglise, & vn reduit pour
les tenir en asseurance, contre les
incursions des Iroquois, dont la
crainte les suiuoit par tout: il a fallu
leur fournir des chaudieres, & des
haches, & même de quoi se couvrir
à la plus grande part des familles.
Nous auons esté obligez de con-
tinuer cette depense, pour quan-
tité de pauures, de malades, & de
personnes inualides: en vn mot,
nous leur seruons de Peres, de
Meres & de tout.

Les frais vont à l'excez pour le
nombre de cinq à six cens person-
nes, mais la Charité des saintes
ames qui ont voulu contribuer à
ce grand entretien, est encore plus
excessiue. Leur modestie retient

ma plume, & ne me permet pas de les nommer; ils se contentent que leur nom soit escrit dans le liure de vie, & sans doute qu'il sera immortel.

La deuotion, & la foy regnent dans ce petit reduit, outre les prieres qu'un chacun fait en particulier, soir & matin dans sa cabane, ils assistent aux Prieres publiques qui se font en l'Eglise, à peine distingue-t'on les iours ouurables, des Dimanches & des Festes, sinon par la frequence des Communions, que l'on fait en ceux-cy, & par le Chapelet, que l'on vient reciter sur iour, qu'ils disent hautement à deux chœurs, en la place des Vespres.

L'ordre de venir aux Prieres, est distingué par trois diuers sons de Cloche. Le premier appelle ceux

108 *Relation de la Nouvelle France,*
de la Congregation , l'élite des
Chrestiens. Le second coup est
pour les autres. Le troisieme,
pour les enfans, au dessous de qua-
torze à quinze ans ; qui se diuisent
en deux bandes , les garçons d'un
costé, & les filles d'un autre. Leur
modestie , & leur deuotion feroit
rougir beaucoup de François.

Sortant de la Chapelle , les en-
fans entrent en nostre cour , diui-
sez derechef en deux bandes , on
leur fait vn petit Catechisme.
Ceux qui respondent bien , ga-
gnent quelque chose pour leur
desieuner. Si quelque enfant auoit
commis quelque immodestie du-
rant les Prieres , tant luy , que ses
compagnons , sont priuez ce iour
là , des faueurs ordinaires. Le
mesme arriue aux filles , quand
quelqu'une d'elles manque à son

devoir dans la Chapelle. Cela les retient puissamment, leurs compagnons ou leurs compagnes leur en faisant reproche, qui leur tient lieu d'une tres-grande punition.

La beauté de leur voix est rare par excellence, particulièrement des filles. On leur a composé des Cantiques Hurons, sur l'air des Hymnes de l'Eglise, elles les chantent à rair. C'est une sainte consolation, qui n'a rien de la barbarie, que d'entendre les champs & les bois resonner si melodieusement des loüanges de Dieu, au milieu d'un pays, qu'il n'y a pas long-temps qu'on appelloit barbare.

Autresfois c'estoit une superstition, qui nous a bien donné de la peine à combattre, de chanter

110 *Relation de la Nouvelle France,*
aupres des malades, inuoquant les
demon de la maladie, pour ap-
paifer leur mal. Maintenant cette
coustume s'est tournée en vraye
deuotion. On fait venir les filles
musiciennes, dans la cabane des
malades, pour y chanter les louan-
ges de Dieu.

Vne d'entre elles estant aux abois
de la mort, pouffoit si doucement
ces hymnes, d'un visage si plein de
ioye, que celuy de nos Peres qui
luy vit rendre l'ame, quasi en mes-
me tēps qu'elle acheuoit les sacrez
nōs de Iesus, & de Marie, ne doute
point qu'ils ne fussent en son cœur,
& qu'ils ne le remplissent mainte-
nant des douceurs de l'Eternité.
C'estoit vne maladie, & longue
& douloureuse, qu'elle souffroit
d'un courage digne d'un vray
Chrestien, sans se plaindre, sans

Es années 1653. & 1654. iii

demander la guérison; mais disant cent & cent fois le iour: Iesus voit bien ce qui m'est bon, Iesus m'aime, & il sçait bien que ie le veux aimer. Il voit que ie souffre beaucoup, ie veux souffrir, puis qu'il le veut. Iesus seul est le grand maistre de nos vies, il doit luy seul estre obei.

Leurs songes estoient autresfois le Dieu de leur cœur, maintenant Dieu est dans leurs songes: car la plus part n'en ont point d'autres, sinon de Dieu & du Paradis, & de l'Enfer, & des Anges, qui les inuitent en songe, à venir à eux dans le ciel.

Vn ieune homme malade à l'extrémité, vit approcher aupres de soy (il ne sçait si c'est en songe, ou non :) vn enfant d'une rare beauté, qui le regardant d'un

112 *Relation de la Nouvelle France,*
œil d'amour, & luy inspirant dans
le cœur des sentimens de deuotiō,
plus doux qu'il n'auoit iamais res-
senty, forma sur luy le signe de la
Croix, & luy rendit à l'heure mes-
me vne santé parfaite. Il iugea
lors, & il le croit encore, que ce
soit son Ange gardien. Nous n'en
scauons pas dauantage: mais nous
scauons bien que les Anges ne
trouuent point de difference, en-
tre les Ames des Sauuages, & les
nostres.

La mort d'vne pecheresse con-
uertie dans la maladie me paroist
encore plus aimable, que ne fut
cette guerison. Cette femme
estant tombée malade, fut incont-
inent aduertie par vne sienne
sœur, excellente Chrestienne, de
se preparer à la mort, par vne bon-
ne confession, & dire au plus fort
de

de son mal, Iesus ayez pitié de moy
ie souffre, puis que vous le voulez:
mon peché l'a bien mérité. La ma-
lade obéit, Dieu luy ayant tou-
ché le cœur, en ce même mo-
ment elle enuoye querir vn de
nos Peres, luy descouure tous ses
pechez avec douleur, & repete
sans lassitude cent & cent fois,
avec plaisir, la petite priere que
l'on luy auoit enseignée. Chaque
fois qu'elle voit le Pere, mes pe-
chez, luy dit-elle, sont tousiours
deuant moy, ie ne puis assez les
pleurer Dieu me les a t'il pardon-
nés? enfin la huitaine acheuée;
Mon cœur, dit-elle au Pere, est
maintenant en Paix, j'espère en la
bonté de Iesus, qu'il me fera mise-
ricorde; il m'a pardonné mes pe-
chez & ie verray bien-tost, ma
petite Vrsule dans le ciel. De z le

114 *Relation de la Nouvelle France;*
iour mesme, elle rendir son ame à
Dieu, avec des ioyes qui ne sont
pas conceuables, sinon à vn cœur
vrayement remply des esperances
du Paradis.

Cette petite Vrsule estoit vne
sienne fille d'environ neuf ans,
qui estoit morte fort peu aupara-
uant, prononçant iusqu'au der-
nier soupir, Iesus ayez pitié de
moy.

CHAPITRE X.

*De la premiere Congregation de
Nostre Dame parmy les
Sauuages.*

CE qui a le plus aidé à metre
l'esprit de ferueur dans cette
Colonie Huronne, c'est la Deuo-
tion qu'ils ont pris cette dernière
année, pour honorer la Vierge.

Nos Peres, qui en ont le soin, pour les y animer dauantage, ont fait vne Congregation, où ils n'admettent que ceux, & celles, qui sont d'une vie exemplaire, & qui par leur vertu se rendent dignes de cette grace.

Du commencement cette Congregation n'estoit que de dix, & douze personnes; qui rallumerent leur ferueur, se voyans choisis par preference aux autres, & obligez de remplir la dignité de ce beau nom, SERVITEUR DE LA VIERGE.

La plus part s'en voyans exclus, taschent de s'en rendre dignes: ils demandent humblement à nos Peres, ce qu'on trouue à redire en eux, qu'ils sont prests de s'en corriger, qu'ils veulent estre enfans de Marie, ou mourir en la peine.

116 *Relation de la Nouvelle France,*
On leur dit à chacun leurs defauts,
à l'un, qu'il est negligent aux pri-
eres publiques; à l'autre qu'il n'a pas
assez de soin de mettre en sa famil-
le, l'esprit de Dieu; à vne femme,
qu'elle est trop prompte à la cole-
re: a vn autre, qu'elle est medi-
sante, & que par ses rapports elle
met souuent la diuision dans les
familles. Le bon est, que la plus-
part, en peu de temps, changent
tellement de vie, que nos Peres
sont obligez de mois en mois, d'en
receuoir vn grand nombre, qui le
meritent. Ils y entrent avec des
ioyes inconceuable, dans l'espe-
rance qu'ils conçoient, qu'estre
digne enfant de la Vierge, c'est
estre comme assure de son sa-
lut.

Les Dimanches & les festes, ils
s'assemblent dez le point du iour.

Au lieu de l'office de la sainte Vierge, qu'ils ne peuvent pas reciter, ils disēt leur chapelet à deux chœurs, les hommes d'un costé, & les femmes de l'autre, qui sont en plus grand nombre, & ie puis dire en verité que parmy les sauuages, aussi bien qu'au reste du monde, c'est le sexe deuot. Leur assemblée est d'environ vne heure; car à la fin de chaque dixaine du chapellet, ils font vne pause en silence, où le Pere leur dit vn mot d'exhortation: & souuent le prefect de la Congregation, qu'ils ont choisi eux-mesmes, & bien choisy: car en effet, c'est vn Chrestien d'une rare vertu, & remply d'un saint zele. Apres la premiere dixaine, il les exhorte a prier avec attention, & se resouuenir que la Sainte Vierge les voit. En suite d'une autre di-

118 *Relation de la Nouvelle France,*
xaine, il leur dit que le vray cul-
te de la Vierge, c'est d'avoir le pe-
ché en horreur, & qu'il faut que ce
soit par là, qu'on reconnoisse les
enfans de Marie. Vne autre fois il
leur dit, que ce qui console la
Vierge, c'est lors qu'elle voit qu'e-
stans sortis de la chapelle, ils ne
s'oublient pas d'elle, & que sans
cesse, ils luy disent du profond du
cœur, sainte Vierge ie veux vous
servir, en suite d'une autre dixai-
ne: Mes freres, leur dit il, quand
nous sommes tentez, c'est alors
que vraiment la sainte Vierge
voit ceux qui ont du respect & de
l'amour pour elle. Disons luy dans
la tentation, Sainte Vierge c'est
vostre Fils Iesus que j'aime, plus
que ce plaisir qui me tente. Si la
tentation continuë, continuons à
luy dire le mesme: quiconque ai-

me Iesus, n'aime pas le peché.

Cette premiere assemblée du matin, n'est qu'une disposition pour la messe, qui se dit sur le haut du iour, où plusieurs Communient, avec des tendresses, qui nous font voir que Iesus est le Dieu des sauvages, aussi bien que le nostre. Le Gloria in excelsis, le Credo, le Pater, tout se chante par nos musiciens & musiciennes innocens, en langue Huronne, sur le mesme chant de l'Eglise, non pas qu'ils chantent la messe : mais ils chantent pendant la messe, ces hymnes & ces saintes prieres.

Sur le midy, ils se rassemblent pour le sermon, & pour le chapellet qui se dit encor à deux chœurs, comme le matin, meslant à la fin de chaque dixaine, le chant des hymnes de l'Eglise, où ces bons sau-

220 *Relation de la Nouvelle France,*
uages reçoient, & donnent beau-
coup de deuotion.

Le soir, proche de la nuit, on s'assemble pour vn salut: où se chantent les Litanies de Iesus, ou celles de la Vierge, & quelques motets Hurons, en l'honneur du saint sacrement.

L'ambition des Congreganistes, c'est d'estre irreprochables en leurs mœurs, & c'est en quoy Dieu les benit. Les ieunes filles & femmes, sont quasi à couuert de la tentation, dez qu'elles ont pû obtenir d'estre de la Congregation: Elle est fille de Marie, dira-t'on à vn debauché, c'est à dire, qu'il n'a rien à esperer de ce costé là. Je suis fille de la sainte Vierge, disent-elles pour toute responce, à quiconque a le front de leur porter vne mauuaise parole.

En effet, c'est vne chose rauissante de voir la tendresse, & la pureté de leur conscience, dans la liberté qu'elles auroient de pecher, si la crainte de Dieu n'estoit plus forte dans leur cœur, que ne peut estre vne coustume inueterée en vn pais depuis quatre mille ans, qui leur permettoit en cela, tout ce que le plaisir agréé.

Le pardon des iniures, est vne marque des plus certaines de l'amour de Dieu en vn cœur. Vne mere voyant son fils vnique, battu avec outrage, & blessé grièvement par vne femme, que la passion auoit emporté dans l'excez: quoy que le sang dont cet enfant estoit couuert, l'emeust à la vengeance, qui luy estoit faite, va trouuer en pleurant le Pere qui gouverne sa conscience. Je te prie, luy dit-elle, viens avec moy dans

122 *Relation de la Nouvelle France,*
la chapelle de Marie: mon cœur
voudroit estre meschant; mais tu
nous apprends que la Vierge n'ai-
me que la douceur; tu nous as dit
qu'elle a veu crucifier son fils,
qu'elle a pleuré dans ses douleurs;
mais que ses larmes parloient à
Dieu, aussi bien que son cœur, &
qu'en mesme temps elle pardon-
noit à ses ennemis. Je pleure l'ou-
trage fait à mon fils; mais ie veux
que mes larmes soient semblables
à celles de Marie, ie pardonne de
tout mon cœur à celle qui m'a of-
fensé.

Sortans de la chapelle, ils font
rencontre de la tante de l'enfant
blessé, qui au bruit de ce qui estoit
arriué en la personne de son nep-
veu, auoit esté avec escorte pour
se vanger de cette iniure; Vne
bonne Chrestienne la voyant de-
dans l'emotion; hé quoy, ma sœur,

luy dit-elle, tu t'oublies donc que tu es fille de la Vierge, & que la vangeance d'un bon Chrestien, c'est de pardonner les iniures? Va t'en trouver le Pere, & qu'il te guerisse l'esprit. Cette tante venoit pour trouver cette guerison : mais elle estoit desia guerie, puis qu'elle le vouloit estre. C'est la sainte Vierge qui fait dans les ames ces changemens, qui ne sont point des ouvrages de la nature.

Vne autre Mere voyant mourir une fille qu'elle aimoit tendrement, sainte Vierge, luy disoit-elle, i'estois inconsolable par le passé, quand quelqu'un de mes proches mouroit; mais depuis que ie suis vostre fille, & que ie sçais que pour vous agreer, il faut vouloir ce que Dieu veut, ie suis contente de voir mourir mon cher enfant,

124 *Relation de la Nouvelle France,*
ie n'ay plus besoin d'autre consolation, sinon que vous estes ma mere, & que ie seray vostre fille, pourueu que ie dise à Iesus que ie trouue bon ce qu'il fait.

La grace, que demandent sur toutes autres choses, ces bons Congreganistes, c'est celle d'une heureuse mort, & c'est celle que la sainte Vierge leur a donné iusques à maintenant, plusieurs estans morts cette année.

La premiere fut vne ieune femme d'environ trente ans: Se voyât accueillie d'une pleuresie qui courroit, elle va dans la Chappelle de Notre-Dame, elle s'y confesse avec tant de larmes, & de sanglots que le Pere qui l'entendoit en confession, m'a assuré, n'auoir iamais esté si touché en sa vie, qu'il le fut cette fois la. Elle entend vne Mes-

se entiere à deux genoux, nonobstant l'excez de sa douleur. Le n'en puis plus, dit-elle en sortant; mais puis qu'il faut mourir, ie veux mourir en honorant la Vierge. Sus iour, vn de nos Peres la va voir, il la trouua disant son chapelet: Ma sœur luy dit le Pere, contente toy de parler en ton cœur à Dieu, & de luy dire qu'il ayt pitié de toy. Ouy bien, dit elle, ie le diray sans cesse, car ie ne puis songer qu'à luy. En effet elle auoit tousiours cette courte priere au cœur, & souuent en la bouche; mais lors que la vehemence du mal relaschoit quelque peu, elle reprenoit son chapelet & disoit que cette priere luy sembloit plus douce, & plus aimable que toutes les autres.

Durant tout le cours de sa mala-

126 [*Relation de la Nouvelle France,*
die, iamais elle ne nous demanda
aucun soulagement pour son
corps; toutes les pensées n'estoiēt
que pour son ame: elle ne vouloit,
& ne pouuoit quasi entendre par-
ler d'autre discours. Quand mes-
me nous l'intreroigiōs de son mal:
Mon frere, disoit-elle, ne te mets
pas en peine de ce corps languis-
sant qui doit pourir; mais parle
moy de dieu, car cela seul est ce qui
me console; Au moindre mot
qu'on luy peust suggerer de quel-
que courte priere, elle l'ampli-
fioit d'elle mesme & nous ra-
uiſſoit des sentimens de Pieté
qu'elle monstroit.

Au mesme temps que celle-cy
estoit malade, sa Mere, vne an-
cienne Chrestienne, l'estoit aussi;
couchée vis à vis d'elle, qui mou-
rut fort peu de iours apres. Cette

pauvre fille mourante encourageoit sa mere, à supporter avec amour les douleurs de la maladie, & à attendre avec ioye les moments de la mort. La mere nous assura que nuit & iour cette bonne fille ne cessoit de prier Dieu, & qu'une fois entre autres, apres auoir souuent reïteré cette priere, Iesus ayez pitié de moy, menez moy dans le ciel à l'heure de ma mort; qu'elles'estoit escriée, Voila Iesus qui vient ayant pitié de moy. O que vous estes beau, mon bon Iesus, ie vous red grace, vous aurez d'oc pitié de moy: menés moy d'oc au ciel, puis que ie vais mourir.

Vn de nos Peres suruenant la dessus, & la voyant proche de la mort, luy mit son Crucifix en main, luy suggerant quelques courtes prieres, mais cette heureuse agonisan-

128 *Relation de la Nouvelle France,*
te, ne se contentant pas de si peu,
continua d'elle-même à apostro-
pher Iesus crucifié, avec des sen-
timens si affectueux qu'elle tira des
larmes des yeux de ce bon pere qui
l'assistoit. C'est donc, ô bon Iesus,
luy disoit-elle, pour vne pauvre
goueuse, comme moy, que vous, le
maistre de nos vies, avez souffert
d'estre crucifié en la façon que ie
vous voy! Ce sont mes pechez, ô
Iesus, qui vous ont déchiré tout
le corps! O malheureux peché! ô
malheureuse pecheresse! maudits
pechez qui avez fait des playes si
cruelles aux pieds, & aux mains de
Iesus. Pourquoi vous ay-ie iamais
donné entrée dedans mon cœur?
O Iesus mort, pour mes pechez!
que ne meurs-ie de douleur, de
vous auoir si souuent offensé.

Sa deuotion luy donne du cou-
rage,

ragée, elle reprend ses forces, elle se leue sur son seant, pour l'adorer avec plus de respect, puis se recouche sur sa pauvre escorce. A peine le Pere estoit forry à quatre pas de la cabane, ne la croyant pas si proche encore de la mort qu'elle expira. Voila sans doute vne mort precieuse aux yeux de Dieu. Ce sont là les premices des fruits qu'a produit pour le ciel, la Congregation de la Vierge. Cette femme se nommoit Magdelene Andorons.

Le second de ceux que Dieu à appelé à soy, est vn ieune-homme d'environ 36. ans, nommé Armand, qui depuis 17. ans, ne s'estoit iamais dementy des promesses de son baptesme; mais depuis l'établissement de la Cōgregation, il auoit redoublé ses ferueurs. tous les iours il entendoit deux Messes;

130 *Relation de la Nouvelle France,*
quelque rigueur du froid qu'il fist
au plus fort de l'hyuer, il les en-
tendoit les mains iointes, les deux
genoux rous nuds en terre, dans vn
respect de deuotion qui n'auoit
rien de sauuage. Ses prieres finies,
il alloit trauailler en son champ,
soit pour abbatre la forest voisi-
ne, soit pour brusler les arbres, &
rendre la terre labourable, qui est
vn trauail tres penible. Le peu de
repos qu'il prenoit de temps en
temps, il l'employoit à dire son
chapelet, souuent cinq & six en vn
iour.

Estant tombé malade, il desira
d'estre porté à l'hospital pour y
estre assisté des saintes filles; (c'est
ainsi que nos Hurons appellent
les Religieuses) elles le reçoient
auec amour, ces bonnes Meres ne
font que charité, non seulement

pour les malades, mais pour tous les sauuages. Sa maladie ne sembloit riẽ, & au bout de trois iours, il parloit de sortir. Le lendemain matin, il sent vn violent mal de teste, il fait appeler vn de nos Peres de langue Hurõne, qui connoissoit son cœur, depuis long temps. Il faut, Mon frere, luy dit-il, que tu me disposes à mourir. Confesse moy, car ie sens bien que le temps en approche. Il se confesse avec loisir, & avec des sentimens de componction, au dessus de ce que ren puis dire. Oüy, mon frere, ie croy, disoit-il. Iesus qui voit mon cœur, void bien que ie suis fasché de ne l'auoir pas seruy fidelement. Il m'a fait bien des graces; mais celle cy est la plus grande, que ie me voy mourir Chrestien, ie ne regrette point la vie, & ne crains

132 *Relation de la Nouvelle France;*
point la mort, puisque Iesus aura
pitié de moy. A peine auoit-il
acheué, que la violence de son mal
luy fait perdre le iugement; mais
dans tous ses delires, il ne parle
rien que de Dieu: en peu de temps
il expira, ayant receu l'extreme-
onction.

Sa veufue, nommé Felicité, lors-
que i'escriis cecy, est aux abois par
vn effort d'amour de Dieu, ou du
moins, par les efforts d'une victoi-
re digne d'une ame vraiment
Chrestienne. Il n'y a que deux iours
qu'il est icy arriué vn canot, en-
voyé expres des trois Riuieres
pour l'inuiter d'aller voir vn sien
frere unique, naturalisé parmy les
Iroquois, qui y sont abordez, ce
frere souhaite de luy parler, & elle
a tousiours eu pour luy vne tendre
affection. Cette nouuelle dez son

abord la transporta de ioye, & luy fit prendre le dessein de faire ce voyage. Comme elle estoit sur le point de partir, & que le canot estoit desia mis à l'eau, nos Peres ont crainte que son frere ne l'emmene avec luy, dans le país des Iroquois où il retourne; & que là son innocence, & son salut ne se trouue en danger. Mes freres, respond-elle, ne craignez point pour moy. Dieu me conseruera la foy, & en suite l'innocence que ie luy ay promise, receuant le baptisme. Il est **vray** que mon frere a bien du pouuoir sur mon cœur; mais Iesus en a dauantage. Nos Peres luy remonstrent doucement le danger de succomber à vne tentation, qui paroist innocente, de suiure vn frere qu'elle a touiours aimé, & ils luy disent, que si vraye-

34 *Relation de la Nouvelle France,*
ment elle aime Dieu, elle luy doit
offrir ces violents desirs, qu'elle a
de le reuoir, & qu'il faut qu'en ce-
la, elle se vainque soy-mesme,
puis qu'il y va de son salut. Est-il
vray, respond-elle, que pour aimer
Iesus, il faille demeurer icy? La na-
ture a beau dire, mō cœur a beau le
desirer, mes yeux ne verront point
ce frere que i'ay tant souhaitté. La
dessus ses yeux fōdent en larmes.
Non, non, dit-elle, mon voyage ne
se fera point, quoy que i'en deus-
se estre au mourir. Chose estrange
l'effort de ce cōbat de la nature &
de la grace est si puissant sur elle,
qu'elle en tōbe en vne pamoison,
qui la tient pres de vingt quatre
heures, entierement priuée des
sens, & en grand danger de mou-
rir. Quoy qu'il en soit, c'est vne
marque que les cœurs des sauua-

ges ne sont pas insensibles aux
mouuemens de Dieu, & que la foy
les eleue aussi bien que nous, au
dessus des sentimens de la nature.

Pour finir ce chapitre, qui n'au-
roit point de fin, si ie raportoï la
centiesme partie de ce que Dieu
fait dans leurs cœurs, le diray que
ces bons Congreganistes, ont pris
vne sainte pratique tous les Di-
manches, de faire vn petit present
à la Vierge, chacun d'autant de
grains de Porcelene, qu'ils ont dit
sur la semaine de chapelets, le
nombre va quelques fois iusq'ua
sept & huit cens de ces grains, qui
sont les perles du pais, leur deuo-
tion les à porté à en faire quelques
colliers, en espee de broderie, où
messant les grains de porcelene
violette, avec les blancs, ils escri-
uent ce qu'ils desirent dire en

136 *Relation de la Nouvelle France,*
l'honneur de la Vierge.

Ils ont fait côme vn fisque public, composé de leur pauvreté, ie veux dire de leurs petits presens, dont ils se seruent pour secourir les pauvres, avec vne pieté toute aimable. nous les aidons à l'augmentation de ce petit thresor, y ayant appliqué quelques aumosnes venues de France, & entre autres, vne Charité de Messieurs de la Congregation de la maison professe à Paris.

Ces bons Hurons Congreganistes, s'estans assemblez depuis peu, pour leur en faire vn remerciement à leur mode, leur ont destiné vn collier, où sont escripts ces mots, en porcelene noire, sur vn fond de porcelene blanche. *Aue Maria gratia plena*, & ils m'ont prié d'accompagner ce present de leur de-

és années 1653. & 1654. [137

uotion, d'une lettre que j'ay escrite
en leur nom, sur de l'escorce de
bouleau, qui tient lieu de papier,
dont voicy la teneur.

*Asataken te et sinnonron ksan-
nionkatoen asat*

ENnnhieck xrochen ara atias
ende ontera aaxenhon aiaxa-
chienda en Marie Iesxs hondxen
rohaone staaxaroni aaxenhaon on-
dechaxeti ondikiokxi chiach otio-
kxato eti dia enk aondioura on
Ato en Iesxs hechi ena Skendiunra
roxaxa stan onëk te rehonnrak xario
ierhe a echiendaen; onxiatendo-
tondi a axen kxario hatindore da-
athatori hxannene (ifa restir) da
ak onachiendaenk te andakxateri
ifa echien Skxahenton endi echi-
en eetfiennonteen Iesxs hondxen

138 *Relation de la Nouvelle France,*
te a o annra d'eesaet, onde fksan-
di onrantrahxi stan te fksannon-
kona θora onne io ennhæ ontas-
kouentenrihatie ate o, ennhæ
staniefta efχsannontenk onde ati
onsatres ti onyahachen ionxen
stan in a iaxinnont de varieæodta-
sen, chia aoxenhaon stante hotie-
fexas, ifondakisannen, nien aa-
konannonhæ IEsus hondsen,
aiaχcharon ꝑ on nonkæarota on-
de hasten. ahiatonkxi doki Aro-
hia, eronnon te onnonronkæani-
onti vario ꝑ ꝑ ionnonkæarotahe
daeocharonniati ti arenfaenonæ-
renso trahxi trudi stontaaataton.
Tfieharaenχsas asken varie stihon
χondeefachien daentakæa de æen-
dar ersiafkannhadefa æerheθusen
te æachiendaenk ti onachienda-
ouk : æeri te onæandiontæarie
aionæa hetfaronhons d'IEsus hena

afonxandienrontraak diaxachien-
 daen, ifa de erfsonxeskxen, % ioti
 nonionhxa onioneskxandik onne
 skxahxichenion ti skxachiendoek.
 Onxe d'hoenxçi haoneskxandik
 onneaxeti hondoiarifene hondi,
 onrachen d'afon te iatendxefohie-
 docha. ifa de skachiendaenk xarie
 daakaroëna % ioti te skxaannia da
 at ondxtsaxastis ondorari de, aron-
 hiae exatchxaten, endi te onxan-
 diont % ioti te onxa, annra docha,
 onde ichien ochiensennik. Te ato
 en te skxannonhxs xarie herfihet-
 faron d'iesxs a han doierisern era-
 xeti de xarie oenxçi aioneskxen.
 Taxatrendaenhas de skxarenferrak
 xarie orensa xen eetfiatrendaen-
 daenhas denxanensotrakendi. kxa-
 taxen onne i, en, a, enrhon onxa
 en afei onne d'iesxs hondxen % io-
 ti de rfonhxa skxaenasti. On xan-

140 *Relation de la Nouvelle France,*
nonhæ, din nendi ayanonhæ.
Onne^o i, arihetfi de Hechon
sagarchotrahendi iostæn, sehia-
ton, sade arati iŕchuen asaihe
nsi te ayan non dateri ahia-ton.

Ayatæxen te etfinnonronk gan-
nionck atoen aga Chiaxa Oac-
honk sarue harihæa sennik Louis
Aŕaratæ annen Chaole son deas-
kon.

Et au dos est escrit,

*A Messieurs de la Congregation de
Nostre Dame en la Maison Pro-
fesse de la Compagnie de IESVS.*

A PARIS,

Dela part des Chrestiens Hurons
de la Congregation de Sainte
Marie,

En l'Isle d'Orleans pres Quebec
en la Nouvelle France.

MES FRERES nous vous hon-
norons sans feintise. Ce
n'est que depuis vn an, que nostre
esprit s'est ouuert, & que nous
auons pris les pensées d'honorer
Marie, la mere de Iesus. Cefut lors
qu'on nous dit; qu'il y auoit en tous
les lieux du monde, des assemblées
qui se formoient pour luy dire
dans le fond de l'ame, ouïy, Mere
de Iesus, tu vois mon cœur, & tu
vois qu'il ne ment point, quand il
te dit, Marie ie te veux honorer!
On nous dit qu'à Paris, où vous
estes honorez des hommes, il y a
plaisir de vous voir, que vous met-
tez tout vostre honneur à honorer
la Vierge. Vous nous avez deuan-
cé, & nous voulons vous suiure.
La mere de Iesus qui regarde les
pauures, vous a poussé à ne les pas

142 *Relation de la Nouvelle France,*
mépriser. Depuis plusieurs années
vous nous avez enuoyé de riches
presens. Nous nous sommes assem-
blez, & nous auons dit, qu'en-
uoyons-nous à ces grands serui-
teurs de la Vierge? Nous auons dit
Ils n'ont en rien besoin de nous,
car ils sont riches, mais ils aiment
la mere de Iesus, enuoyons leur vn
collier de nostre Porcelene, où est
escriit le salut qu'vn Ange du Ciel
apporta à la Vierge. Nous auons dit
autant de chapelets, en l'espace de
deux lunes, qu'il y a de grains dans
le collier, vn grain de porcele noire
en vaut deux de blâche. Presentez-
luy ce collier, & dites luy que nous
la voulons honorer. Nous vou-
drions bien l'honorer autant que
vous : mais nous n'auons pas tant
d'esprit que vous, pour seruir Dieu.
Si la mere de Iesus demande à son

filz, qu'il nous donne vrayement
l'esprit qu'il faut pour l'honorer;
c'est alors que nous l'honorerons
dauantage. Vous en serez bien aise
en la même façon que nous som-
mes bien aises, que vous l'honno-
riez mieux que nous. Vn labou-
reur est content, quand il voit tous
les epys de son champ bien meurs.
Cela l'atriste, s'il en voit quelques-
uns qui ne soient pas meurs, quand
il faut les cueillir. Vous autres, qui
honorez la Vierge de tout vostre
cœur, elle vous regarde comme
des epys de son champ meurs pour
le ciel. Nous autres qui n'auons
pas encore d'esprit, & qui ne fai-
sons que commencer a seruir la
Vierge, elle nous regarde comme
les epys qui ne sont pas encore
meurs. Cela l'atriste. Puisque vous
l'aimez, demandez à Iesus que

144 *Relation de la Nouvelle France,*
tout le champ de la Vierge soit
meur comme il faut , pour le ciel,
afin qu'elle soit contente. Priez
pour nous quand vous direz vos
chapelets, nous prierôs pour vous,
difans les nostres. Nous sommes
freres, puisque la mere de Iesus
est nostre mere, aussi bien que la
vostre. Elle nous aime, & nous vou-
lons l'aimer. Voila ce que nous
auons prié Echon de vous escri-
re, pour nous , car nous sçauons
parler : mais nous ne sçauons pas
escrire,

MES FRERES,

Jacques Oachonk } C'est le Prefect de
la Congregation,

Louys Taieron, } Ce sont les deux
Ioseph Sondoukon } Assistans.

Vous honorent & vous salüent sans feintise.

Offrande

*Offrande d'une escharpe de Pourcelaine
faite par les Hurons à la Vierge
Patronne de la Congregation de
Messieurs de Paris.*

T Sendaon de Aronhia e sen-
da erati onnonhiasxi cle-
fannontenk a atatoeti de sendat
acharo nonde de charato eti, on-
nonksarota da at onsenles onsa-
charonniati Aronhia, eronn on a-
enda on'ahiaxonksi onde te san-
nonronksannionti de k, Gasrier,
conksa andronnonksacharonniati,
aonhsa, andoron doki, asendaon-
sahiatonksi, varie re staksateri son
esksensken desachera enxsindik.
Ondeskin atasaatarirontak aron-
hia de asenhe.

EXPLICATION.

REceuez, ô Dame du Ciel, ce present, que vous offre l'élite de vos Seruiteurs Hurons. C'est vn Colier plein de mystere. Il est composé de nos plus fines Perles. Il est animé, & enrichy de la Voix, & du Salut, que l'Ange Gabriel vous a fait autresfois. Nous n'auons rien de plus precieux en nos mains, ny rien de plus saint dans nostre cœur pour vous estre présenté, & pour obtenir le Ciel par vostre moien.

CHAPITRE XI.

Remarques tirées de quelques lettres & de quelques memoires venus du pais.

ON escrit des trois Riuieres deux choses qui meritent de

tenir lieu dans ces Remarques.

La premiere est; Qu'une troupe de d'Iroquois aiant passé l'hyuer parmy les Algonquins, on n'a remarqué aucune mes-intelligence entre ces deux Nations, les plus superbes, & les plus opposées, qui soient dessous le Ciel. Iusques là, que les Iroquois ne donnoient jamais la vie à aucun Algonquin, quand ils le pouuoient attrapper, ou surprendre dans la chasse qu'ils faisoient aux hommes.

Or non seulement ils se sont bien accordés: mais les Algonquins ont esté si satisfaits de leurs hostes, qu'ils ont permis aux femmes veufues, & aux filles de leur Nation, epouser quelques Iroquois. Et vous diriez que Dieu n'a pas improuué ces alliances: Car ces Nouveaux mariés estants à la

148 *Relation de la Nouvelle France,*
chasse avec leurs femmes Chre-
stiennes, & ne trouuant ny gibier,
ny venaison, ils leur dirent; Il ya
desia quelques iours, que nous
courons ces grandes forests, sans
rien trouuer, que ne priés vous ce-
luy qui a fait les animaux de nous
en donner pour nostre nourriture,
puisque vous le connoissés? Ces
bonnes femmes se mettent en
prieres: elles demandent à man-
ger à Dieu; comme feroit vn En-
fant à son Pere: Chose estrange!
Quoy que ces Chasseurs, eussent
battu tous les environs de leurs
Cabanes, sans rien trouuer, ils ne
laisserent pas des le lendemain de
rencontrer & de tuer dans le mes-
me quartier, vn grand Eslan: ce
qui les surprit, s'estonnant bien
fort de l'oraison des Chrestiens, &
de la bonté de leur Dieu.

La seconde chose est, qu'enfin Paul Tessouchat ce borgne tant fameux, autresfois Capitaine des Algonquins de l'Isle, qui a esté l'orateur de son siecle en ces contrées, & le mieux disant de son temps: Enfin, dy-ie, cet homme tout bouffý d'orgueil, est mort dans l'humilité Chrestienne: donnant sur la fin de sa vie, de grands arguments de son salut. Les jugements de Dieu sont estonnans ! Cette bonté infinie voulant sauver cet homme autresfois si opposé à la Foy Chrestienne & à la grace, a cause de son faste, l'a disposé à l'humilité par vne maladie de deux ans.

Dans laquelle se voyant bas devant Dieu, il disoit souuent au Pere qui auoit soin de son ame, qu'ad ill'alloit visiter: Tu me fais plaisir,

150 *Relation de la Nouvelle France,*
approche toy, & me dis ce qu'il
faut faire pour bien mourir; le t'é-
couteray volontiers. Le Pere luy
parlant de la grandeur de Dieu, &
de la remerité de ceux qui luy resi-
stent par leurs offenses: ce pauvre
homme touché iusques au fond
du cœur, s'écrioit, Approche ap-
proche mon Pere, que ie te decou-
ure toutes les plaies de mon ame,
& toutes les malices de mon cœur.
Prie celuy qui'a tout fait, qu'il de-
tourne de mon chemin tous mes
pechez: afin qu'en mourant ie n'en
rencontre pas vn seul. De fois à
autres il prenoit son Crucifix & le
baisoit avec tendresse: c'est en toy
seul, luy disoit il, en qui i'ay mis ma
confiance, Puis que tu es mort, c'est
la raison que ie meure; & puis que
tu es mort pour mes pechés, fais
moy misericorde. ouure moy la

porte de ta maison : le hay cette
meschante carcasse, ie la quitteray
quand tu voudras. En effet il se
detacha entierement des soins de
son corps, qu'il auoit tant aimé;
ne se souciant plus des petits soula-
gemens qu'on donne aux malades;
notamment depuis ie ne sçay
quelle veuë qu'il eut dans son som-
meil. Il se trouua au pied d'une
haute montagne, dont le sommet
se deroboit de ses yeux. Il entendit
vne voix qui luy dit à plusieurs re-
prises, monte cette montagne,
c'est le chemin que tu dois tenir. Le
me trouuay à cette voix, disoit il,
faisy d'une grande fraieur; mes
forces ne me permettans pas de
grimper sur vn mont qui me pa-
roissoit plein de precipices. Com-
me i'estois dans cet abbatement,
i'apperçeu vne grande eschelle, &

152 *Relation de la Nouvelle France,*
vn Pere à mō costé, qui me prenant
par la main, me fit monter sans
beaucoup de peine. Cette veuë le
cōsola fort, & luy donna vne gran-
de esperance d'entrer au Ciel par
Iesus Ch. qui est certe Montagne.

On nous fait entendre que Noël
recouerimat, Capitaine des Chre-
stiens de saint Ioseph, à Sillery,
soustient cette nouvelle Eglise par
son exemple, & par son courage :
faisant teste à vne troupe d'Al-
gonquins peu affectionnés à la
foy, qui se sont venus ietter en
son distric, à la faueur de la Paix.
Ils ont taché de le separer d'auec
nous, par presens, par caresses, &
par quelques paroles trop hardies,
l'attaquant dans vne conioncture
tres fauorable (à ce qu'ils croioiēt)
pour faire reussir leur dessein. Ce
grand homme de bien aiant per-

du quantité de beaux enfans, Enfin Dieu luy a rauy son petit Beniamin, celuy qu'il aimoit avec plus de tédresse. Les Ennemis de la foy, & de la verité le croiant ébranlé, l'assaillirent dans son affliction; Mais ils trouuerent vne teste de fer, vn cœur d'or & vne bouche qui iettoit des foudres, quoy qu'elle ne fust réplie que de miel. Les aiant assembles, il leur dit. mes freres, iefay plus d'estat de la Foy, que de toutes les choses de la terre. le mourray dans la creance des veritez que i'ay embrassées: L'affliction n'abat point mon cœur: La douceur ne le sçauroit charmer: Et les menaces ne l'ébranleront iamais. Il importe peu que vous nous mesprisiés & que vous, nous teniés pour des gens qui n'ont point d'esprit: nous autres

154 *Relation de la Nouvelle France,*
qui croions, & qui prions, & qui
voulons obeir à celuy qui a tout
fait. Quand ie serois seul, & quand
tous ceux qui croient ; m'auroient
abandonné, ie ne quitterois ia-
mais la priere. Si vous voulés vous
ranger du party de Dieu, ie suis à
vous : sinon sçachés que tous ceux
qui ont le cœur tortu, & la bou-
che de trauers, tous ceux qui ont
deux femmes : tous ceux qui se ser-
uent encor de leurs tambours, &
de leurs superstitions, n'entreront
iamais daus le Reduit des Chre-
stiens, si ie suis escouté. Il a tenu sa
parole ; car si quelqu'un de ces li-
bertins, s'est venu presenter de-
uant Sillery, il l'a contrainct de
cabaner hors l'enceinte, qu'on a
fait dresser pour les enfans de Dieu.

Vne lettre venue de Sillery, dit
qu'on deconure tous les iours, de

nouvelles Nations de la langue Algonquine. l'espère de voir dans quelque temps, dit vn Pere, les terres, ou plustost les bois, qui sont sur les bords de la mer du costé du Nord, où il y a des bourgades de Sauvages, qui parlent comme nos Montagnets, que nous entendôs. Ces peuples n'ont encor iamais veu aucun European. Ils se seruent encor de haches de pierres: ils font bouillir leur viande dans de longs plats d'escorce, qui leur seruent de chaudiere, comme faisoient autres fois nos Sauvages. Ils n'ont aucuns ferremens; tous leurs outils sont d'os, ou de bois, ou de pierres.

Vn autre dit que dans des Isles du Lac des gens de mer, que quelques vns appellent mal à propos les Puants, il y a quantité de peu-

156 *Relation de la Nouvelle France,*
ples dont la langue a grand rap-
port avec l'Algonquine : Qu'il
n'y a que neuf iours de chemin de-
puis ce grand Lac iusques à la mer,
qui separe l'Amerique de la Chi-
ne : Et que s'il se trouuoit vne per-
sonne, qui voulust enuoyer trente
François en ce pais-là, non seule-
ment on gagneroit beaucoup d'a-
mes à Dieu ; mais on retireroit
encor vn profit qui surpasseroit les
despeses qu'on feroit pour l'en-
tretien des François qu'on y en-
uoyeroit, pource que les meilleu-
res pelleteries viennent plus abon-
damment de ces quartiers-là. Le
temps nous decouurira ce que
nous ne sçauons encor que par le
rapport de quelques Sauvages, qui
nous assurent auoir veu de leurs
yeux ce qu'ils expriment de leur
bouche.

La Reyne ayant de la tendresse pour la conuersion des Sauvages, & de l'affection pour l'establissement de la Colonie Francoise en ce nouveau monde, y enuoya ce Prin-temps dernier quelque nombre de filles fort honnestes, tirées de maisons d'honneur. On n'en reçoit point d'autres dans cette nouvelle peuplade. Je sçay d'assurance, que dix-huict ans se sont écoulés, sans que le Maistre des hautes œuures qui estoit en ce pays-là, ait fait aucun acte de son mestier, sinon sur deux vilaines quel'on bannit apres auoir esté publicquemēt fustigées. Tant que ceux qui tiennent le timon, deffendront aux Vaisseaux d'amener de ces marchandises de contre-bande; tant qu'ils s'opposeront au vice, & qu'ils feront

158 *Relation de la Nouvelle France,*
regner la Vertu , cette Colonie
fleurira, & sera benite de la main
du Tres-haut.

Mais pour retourner à ces bonnes Filles , Dieu leur a fait la grace apres mille dangers , & mille bourrasques , d'arriver à bon port avec vne braue & genereuse Amazone, que Dieu leur auoit donnée pour guide : C'est la Mere Renée de la Natiuité, Religieuse Hospitiere de la Maison des Filles de la Misericorde de Quimper en Bretagne. Cette braue fille a eu quasi autant de peine, pour ainsi dire, d'étrier en ce pais de Croix, & de souffrance, que les Israhelites en ont eu, pour entrer dans la terre de promesse ; mais enfin son courage, sa fermeté, sa perseuerance luy ont obtenu le congé & la benediction de Monseigneur son Euesque, &

la permission de sa superieure, & l'aggreement de sa Communauté, pour aller donner secours à ses sœurs, qui exercent sainctement la Charité enuers les malades François & Sauvages, en ce bout du monde. Les tempestes, & les dangers la reieterent deux fois dans le port, avec toute sa troupe. La maladie la terassa pour quelque téps: mais son cœur plus grand que le mal, plus fort que les dangers, la plus animé de l'amour de son Dieu, & de la charité du prochain, que les tempestes, du soufflé des vents, iouit maintenant d'un calme, & d'une bonace, qu'elle ne peut exprimer, qu'en disant qu'elle a trouué son paradis.

Changeons de propos, & descendons iusques à Tadoussac les nouveaux Chrestiens de cette contrée,

160 *Relation de la Nouvelle France,*
ont leur quartier d'hyuer, & leur
quartier d'Esté. L'Hyuer, ils en-
trent dans leurs grandes Forests,
pour faire la guere aux Ours, aux
Elans, aux Caribous, aux Castors
& à quelques autres animaux, qui
font les mets de leurs tables. Le
Pere Piere Bailloquet de nostre
Compagnie, les a fuiuis cet hy-
uer dans les bois. Le Capitaine de
Tadoussac l'auoit demandé. On
nous escrit qu'il la fort bien traité.
c'est à dire qu'il luy a tousiours té-
moigné de l'amour, & de l'affec-
tion. Cette bienueillance est à la
verité vne grande douceur: mais
elle n'a pas empesché, que le Pe-
re, n'ait eu la terre pour liect, &
pour matelas, des escorces pour
vn palais moins remply d'air que
de fumée. Qu'il n'ait passé quel-
que mois sans pain, sans vin, sans
sel,

fel, sans autre ragoust que l'appetit: qu'il n'appailoit assez souuent qu'auec du boucan: c'est à dire auec des Anguilles, ou auec de la chair seichées à la fumée, & dans les ordures de leurs cabanes. Cela bien assaisonné d'un grand desir de souffrir pour Dieu: de la candeur & de la vertu des nouueaux Chrestiens, soustient parfaitement le corps & l'ame, d'un Ouurier Evangelique.

L'hyuer tirant aux abois, pour donner la vie au Printemps: Tous nos Chasseurs se retirent auec tout leur bagage, sur les riués du grand Fleuue, en l'Ance, ou au Port, que nous appellonstadouffac, c'est icy où il se fait vne confession publique, sans gehenne, sans torture, & sans exaction. On dit qu'il y a un pais, ou le froid est si grand, que toutes les paroles s'y gellent, &

162 *Relation de la Nouvelle France,*
quand le printemps s'approche,
ces paroles venant à se degeler, on
entéd quasi en vn momét, tout ce
qui s'est dit pendant l'hyuer. Quoy
qu'il en soit de cette fable, Il est
vray, que tout ce qui s'est fait de
mal pendant l'hyuer dans ces
grands bois, se dit publiquement
au Pere au mois d'Auril. Les pre-
miers venus font tout haut la
confession de ceux qui les suiuent,
& cela, par vn zele qu'ils ont de la
Iustice Chrétienne.

Cette année, vn ieune homme
aiaut commis quelque faute pen-
dant l'hyuer, reconnut en appro-
chant du port de Tadoussac, qu'il
ne luy manquoit plus que la dou-
leur, & vne bonne penitence,
pour son crime, remarquant au
visage, & à la contenance du Pere,
& des Anciens, que quelques vns
auoient desia cōfessé pour luy son

és années 1653. & 1654. 163

peché, le regret qu'il en auoit, fit qu'il ne se troubla point. Il se desembarque, va trouuer les principaux Chrestiens, n'osant paroistre deuant le Pere: il leur remoi- gne sa douleur, & leur demande vn bon chatiment pour son crime Ces bonnes gens armés de ze- le, luy ordonnent de se tenir à la porte de l'Eglise les genous en terre, les mains iointes, & les épaules decouuertes, & en cette posture, demander pardon à tous ceux qui y entreroient, les suppliant de tirer vengeance sur luy, de l'offen- ce qu'il a cōmise contre Dieu, & du scandale qu'il leur a donné. Aussi tost dit, aussi tost fait, Ce ieune homme bien ioieux, de n'estre point banny de l'assemblée des Chrestiens, fit gaiement ce que ces bons neophytes luy auoiēt ordonné, Dieu vue ille que ce ze- le

164 *Relation de la Nouvelle France,*
continuë long temps, s'il ne le faut
pas exiger, aussi ne faut il pas l'em-
pescher.

Vn chrestien, qui s'estoit autre-
fois meslé de consulter le Demon,
ou le Manitou, se trouuant dans
les bois, fut viuement tenté de re-
prendre ce malheureux métier. Il
fait dresser vn tabernacle à leur
mode. il entre dedans, contre le
gré, & contre la volonté de sa fem-
me tres-honne Chrestienne, la-
quelle voyant avec douleur cette
meschante action de son mary,
destache vn petit crucifix, qu'elle
auoit à son chapelet, & le met sur
ce Tabernacle. Chose estrange!
cet homme au lieu de chanter, &
de hurler comme ils font en con-
sultant leur Manitou, demeura
muet, & interdit, sans iamais pou-
voir tirer aucune voix de son esto-
mach. le vous laisse à penser s'il sor-

tit confus, & étonné de son tabernacle.

Vn capitaine nommé Iean Baptiste Ekhinechkaouat, étant malade à la mort dans les bois, sec & decharné comme vn schelet, se fit preparer vne medecine, cōposée de ie ne sçay quelle écorce, & de brins de sapin infusés dās de l'eau tiede. Il prēd en main cette medecine, & s'adressant à Dieu il luy dit. Toy en qui ie croy, & que i'honore. Tu as fait les écorces, & les fueilles, qui font les ingrediēs de la medecine que ievay prēdre. tu peux si tuveux me rendre la santé par cette medecine, rien ne t'est impossible. Rend la moy ie t'en prie: fais que ce breuage me soit salutaire. Je le boy au nom du Pere, & du Fils, & du S. Esprit. Aussi tost, dit il, que ie l'euaallé, le senty qu'elle penetrait toutes les parties de mon corps, &

166 *Relation de la Nouvelle France,*
vne force secrète qui se couloit
dans tous mes membres, & à mes-
me temps, il me sembla que ie
voiois tout à l'entour de moy des
Enfans plus beaux que les Anges,
que vous peignés dans vos ta-
bleaux, lesquels me disoient ces pa-
rolles; Ne crains point, tu ne mour-
ras pas. Prends courage, tu viuras.
C'est ce que nous a rapporté ce
bon Neophite homme bien sage
& bien meur. Quoy qu'il en soit,
son cœur fut rempli de douceur,
& d'ôction, son corps fut remis en
santé, & son ame plainement for-
tifiée en la Foy, & en la creance
qu'il a receuë des premiers.

Encor que ie passe sous silence,
quantité de beaux exemples, que
ie remarque dans les lettres, &
dans les memoires qui nous ont
esté enuoiés: le ne puis omettre vne
action de charité faite par vne

Jeune femme Chrestienne, appelée Antoinette Ouabistitecoué. Les Sauvages deuant le Baptisme, n'aimoient pour l'ordinaire que leurs parens, & si quelque enfant se trouuoit destitué de ses proches, ils l'assommoient par charité, disant qu'apres auoir long-temps souffert, enfin il mouroit miserable, n'ayant personne qui le soulageât. Deux pauvres petits abandonnés de la sorte sous vne pauvre escorce, estoient en danger de recevoir quelque coup de hache par vn païen, sans se pouuoir quasi plaindre; & le plus grand n'auoit qu'enuirō onze ou douze-ans, & sa sœur n'en n'auoit que quatre: Celui là auoit vn colier d'écroüelles fort horribles qui luy mangeoient toute la gorge, & la petite auoit vn flux de sang qui la desechoit iusques aux os. Nostre bōne Chrestie-

168 *Relation de la Nouvelle France,*
ne les ayât veuz dās la saleté, dās les
ordures, dans des maladies si vilai-
nes & dans le dernier abandon, en
prend vn soin comme s'ils eussent
esté ses propres enfans. Elle les
nettoye, elle leur va souuent que-
rir des branches de sapin qui ser-
uent de litiere aux Sauvages, elle
leur donne à manger, elle leur
fait du bois & attise leur feu, elle
se leue plusieurs fois la nuit pour
assister la petite, elle leur va cher-
cher toutes les douceurs qu'elle
se peut imaginer, demandant vn
peu de raisin, ou vn peu de prunes
aux François pour leur donner :
Et elle faisoit tout cela avec vne
douceur, vne gaieté, vne con-
stance, qui faisoit bien cognoi-
stre qu'elle estoit animée d'vn
autre esprit que l'esprit des Sau-
uages.

Le Capitaine de Tadoussiac ra-

uy d'un tel exemple, fit vne Harangue au milieu de la nuit à tous les gens, s'escriant à plaine teste. Escoutez-moy, mes Freres, escoutez-moy, ne dormés pas, reueillez vous : le vous parle d'une chose d'importance. Ce ne sont pas deux chiens que nous voions delaislés à la porte de nos cabanes. Ce sont des hommes aussi bien que nous. Ils sont baptisés aussi bien que nous. Vous donnez à manger à vos chiens, vous les caressez quelquesfois, vous les appelez, vous les menez avec vous, & maintenant que nous sommes pressés d'entrer dans les bois, quitterons-nous ces pauvres enfans, qui sont faits comme nous ? Dieu nous les donne en garde. Ayez en soin, ce sont mes enfans, nous dit-il, il regarde ce que nous ferons. Il escoute

170 *Relation de la Nouvelle France,*
ce que nous dirōs, & enfin il nous
traitera comme nous les trait-
terons. En suite de cette Haran-
gue, il commande à sa femme de
donner tout le soulagement qu'el-
le pourra à ces pauvres petits, &
quand ils leuerent le camp, luy
mesme les embarqua dans sa cha-
louppe & les conduisit à Sillery
ou à Saint Ioseph pour y estre
assistez. Ceux qui cognoissent le
genie des Sauvages, diront avec
raison, que Dieu seul peut chan-
ger les pierres en des enfans
d'Abraham.

Vne jeune fille voyant ses pa-
rēs dans les larmes, pource qu'elle
souffroit beaucoup, & qu'elle ap-
prochoit biē fort de son trespas,
leur dit d'un ton qui faisoit paroi-
stre plus de joye que de tristesse.
Pourquoy pleurez-vous? Ne vous
affligez pas, ie m'en vay au Ciel.

Le Pere m'a dit que ceux qui estoient baptisez, & qui obeïssent à Dieu seroient bien heureux. Ne suis ie pas baptisée? Ne croy-ie pas en Dieu? Ne pleurez-point, bien tost ie ne souffriray plus. Le Pere qui a soin de cette Mission entrant là dessus, elle luy dit, Mon Pere, ie me réjoüy quand ie te voy, ie ne crains point la mort, le n'ay rien de meschant dans mon cœur: l'ay tout dit; Tu as embelly mon Ame, elle ira au Ciel. Mourir dans ces sentimens, ce n'est pas mourir en Barbare.

Vn Pere qui a esté bien avant dans le fleuve du Sagné, nous mande, qu'il a fait rencontre au lac de saint Iean, de deux leunes Sauvages Chrestiens, qui se doutant bien qu'ils trouueroient vn Confesseur en ce quartier là, auoient fait deux cens lieues de

172 *Relation de la Nouvelle France,*
chemin , pour se-venir confesser,
& communier, & pour emporter
avec eux vn petit Calandrier, qui
leur enseignast les festes de toute
l'année, c'est de ceux la qu'il est
vray de dire, que de *Longinquo ve-*
nerunt, qu'ils sont venus de loing,
pour adorer I E S V S-CHRIST.

Comme on acheuoit l'Impres-
sion du dernier Cahier de cette
Relation , on nous a rendu vne
Lettre , venuë de la Rochelle ;
qui porte , qu'un Vaisseau , nou-
uellement arriuë de Canadas, dit
que les Iroquois d'en bas , que
nous appellons les Anniehronons,
ayans fait rencontre , sur le grand
Fleuve de S. Laurens, d'un canot,
ou d'un petit bateau, qui portoit
le Perë Simon le Moine à Mon-
treal, conduit par deux Iroquois
Onnontaeronnons ; ont tuë l'un
de ses deux conducteurs , & ayant
massacré

massacré quelques Hurons & quelques Algonquins se sont saisis du Pere, & l'ont mis aux liens. Son autre guide ou conducteur voyant cette perfidie s'est écrié avec menaces, que ses Compatriotes se ressentiroient de cette trahison: qu'il ne se soucioit pas de la liberté qu'ils luy presentoient, qu'il courroit la meisme fortune que le Pere: Et puis qu'ils l'auoient garrotté, qu'ils l'enchainassent avec luy: que iamais il ne le quitteroit: s'il est captif, ie suis captif avec luy: si vous luy ostés la vie, donnés moy la mort, disoit-il, si vous me mettés en liberté, deliés-le. Ces déloyaux craignans les menaces de cét Iroquois des païs plus hauts, delierent le Pere, & le rendirent à son Guide, qui le conduisit à Montreal. Là dessus le bruit est, selon que le rapporte ce Nauire,

174 *Relation de la Nouvelle France,*
que les Iroquois d'en haut vont
prendre les armes avec les François
contre les Iroquois d'en bas. Quoy
qu'il en soit de cette nouvelle, ie
puis dire ce qui suit avec vne gran-
de probabilité.


Premierement que les Iroquois
d'en bas, qui ont eu de la ialousie
contre les Iroquois d'en haut, au
traité de paix qu'ils ont comman-
cé les premiers avec les François:
ne souffriront pas aisement que
ces nations superieures viennent
trafiquer avec nos François: pour-
ce qu'ils ne seroient plus contrain-
tes de passer par leurs Bourgadés.
A quoy le chemin les oblige,
quand ils vont porter leurs mar-
chandises aux Hollandois.

Secondement, le sçay fort bien
qu'il est plus facile aux Iroquois
d'en haut, de descendre au quar-
tier des François, que d'aller cher-

cher les Hollandois. Leur Lac & nostre grand Fleuve les peuuent doucement apporter, & toutes leurs marchandises iusques aux magazins des François : mais quand il faut prendre leur route du costé des Hollandois ils souffrent deux grandes incommoditez. La premiere est, qu'ils sont contrains de faire la plus grande partie du chemin par terre, & à pied, & d'estre eux mesmes les mulets qui portent leur bagage, & leur marchandise. La seconde vient de l'insolence des Anniehronons, qui estans comme les Maistres de ce trafic, ne traittent pas tousiours ciuilement les Iroquois d'en-haut. Peut-estre que ces commoditez & ces incommoditez induiront les Onontaeronons, & les autres Sauuages des païs Superieurs, de rompre plu-

176 *Relation de la Nouvelle France, &c.*
stost avec les Anniehronons, qu'a-
vec les François. Peut-estre aussi
que ce coup n'a esté fait que par
quelques ieunes estourdis, qui se-
ront desaduouëz de leur Nation.
Cette année nous fera voir à dé-
couuert deuant que d'expirer, ce
que nous ne voyons maintenant
que dans des tenebres. Je prie Dieu
qu'il conduise le tout à sa plus
grande gloire. Amen, Amen.

F I N.



1771 The following is a list of the
names of the persons who have been
admitted to the Society of Friends
since the last meeting of the Yearly
Meeting, held at Philadelphia, on the
21st of Yearly Meeting, 1771.
The names of the persons who have
been admitted to the Society of Friends
since the last meeting of the Yearly
Meeting, held at Philadelphia, on the
21st of Yearly Meeting, 1771.
The names of the persons who have
been admitted to the Society of Friends
since the last meeting of the Yearly
Meeting, held at Philadelphia, on the
21st of Yearly Meeting, 1771.

1772 The following is a list of the
names of the persons who have been
admitted to the Society of Friends
since the last meeting of the Yearly
Meeting, held at Philadelphia, on the
21st of Yearly Meeting, 1772.
The names of the persons who have
been admitted to the Society of Friends
since the last meeting of the Yearly
Meeting, held at Philadelphia, on the
21st of Yearly Meeting, 1772.
The names of the persons who have
been admitted to the Society of Friends
since the last meeting of the Yearly
Meeting, held at Philadelphia, on the
21st of Yearly Meeting, 1772.

EA 655 .

L551

C. 2



